

MASIMA ATIBUKILE

 Halu lapeleñi. Mulena, cwale lwa lumela. Lu lumela ku Mwana Mulimu, mi, kufitela kuse, lu amuhela Bupilo Bobusafeli ka Yena. Lu kopani hape, musihali wo, kamba manzibwana a, kwa sebelezo yeñwi, ka kusepa Wena kwa Liñusa ni ka So ka lu bulelela busihu bwa kacenu. Lwa Ku lumela, Mulena, mi lu libelela ku Wena. Mi No ize, “Ba ba libelela ku Mulena baka ncafazwa mata abona; baka pahama lilundu sina mbande.” Mi lwa lapela, Mulimu, kuli U lufe Mata a-kupahamisa ani, busihu bo, halunze lu libelela ku Wena.

² Lwa itumela ku Wena ka batu baa, ni ka seo ba talusa ku Wena ni ka seo ba talusa ku na. Na itumela ku Wena ka sona, Ndate. Ki macwe a butokwa a Hao. Mi Na lapela, Mulimu, kuli busihu bo, kuli U i ponahaze ili Wena mwa nzila, ku bona, yeo ba tokwa. Haiba kuna ni baba kula mo, ha ba foliswe. Haiba kuna ni ku kakanya mwa munahano wa yomuñwi; aku ufelise, Mulena. Mi ulufe fela kwa Pata ya Hao ni limbuyoti za Hao, kakuli lwa litokwa, Mulena. Wena ki wena ya lufa lika-kaufela. Mi, kusina Wena, hakuna se lukona kueza.

³ Lu lapela kuli U amuhele buitumelo bwa zeo kaufela U ezize. Ka Libizo la Jesu Kreste lu libelela limbuyoti za Hao. Amen.

Mwa kona ku ina.

⁴ Cwale, kulukile, ku—ku batile nyana la Sunda busihu bo, mwahali mo, kufita mone kubezi busihu bwa la Sunda yefitile. Lu itumezi hahulu kwa mizwale ya luna baba belekile ka ku sephala kwa ku kondisa lika ze. Na ziba ba babeli kamba ba balalu ba bona. Muzwale Mike Egan, sina ha Ni bona kwa mulaho kwani, mi Na . . . Muzwale Mike, ni Muzwale Sothmann, Muzwale (Na lumela) Roy Roberson, ni Muzwale Wood, ni bani kaufela, nebali kwanu banze ba fufulelwa ka zona, kulika ku kondisa hande kuli lube ni Liñusa le cwale, kamba kacenu. Kacwalo, lu itumezi.

⁵ Cwale, kala Sunda leli tatama kakusasana, haiba Mulena alata, Ni bata kuba ni sebelezo ya ku foliswa, litapelo za bakuli. Mi luka itoma kuba sebelezo ya ku foliswa, haiba Mulena alata.

⁶ Ni lemuhibile, kakusasana wo, kuna ni sishañata sa li tau fa. Ni li lapelezi. Mi Na, hane musweli ku lapela ni kuopela, Ni lapelezi li tau fa; mi he kusa na ni zeñata mo busihu bo. Cwale, lu—lu lumela kuli Mulimu wa folisa bakuli. Kacwalo bupaki bo butuna bwa ku foliswa mwahala luna, ni kwa buse bwa lifasi, mi lu itumezi ka se.

⁷ Mi Na hupula, Sunda yetaha, kakuba kuli Ni lukela kuba kwahule fa nako nyana, mi lubile lu swalelala kwa tuto ni

Liñusa, kuli Ne nihupuzi kuli ikaba taba yende kambe ne lu kaba ni—ni sebelezo ya ku foliswa, ku lapelela bakuli. Mi lu sepa kuli Mulimu uka lufa nako yende.

⁸ Cwale, buñata bwa mina mu lukela ku matisa limota ka limaele zeñata busihu bo. Kacwalo Ne ni ambola kwa likwata kwa—kwa Liapehelo laba Blue Boar, kacenu, hane Ni sweli kuca manzibwana. Batu babande babañata, ne Ni nani ku lumelisana ni bona, batu be Ni sikabe ni kopana nibona haisali, baba tahanga kwa keleke kwanu. Mi Ni itumezi ka balikani baba cwalo, mi Ni bata ku itumela ku mutu ni mutu wa mina. Babañwi ba kubona ba Iwezi mimbulukushu, mi ba lutiselize. Mi yomuñwi u lutiselize mulo o munati mwa hemele, kamba mezi a hamuzwi kwa mishwati, Na sepa neli zona, ni—ni lika fela. Hamuzibi kuli seo si talusa nto mañi. Mi kakusasana, Ni zuha ni kuzwela fande, fokuñwi kuna . . .

⁹ Kakusasana omuñwi neku nani muzwale yomuñwi kwani yana zielehile luli, na sina litino ni libyana, nabata kuli na ni yo mu batela litino. Na to ya, mi Na tobata ku sitatala fa hemele yene nani mimbulukushu fani. Se nili, “Kana ki wena ya tisize mimbulukushu ye nji?”

¹⁰ Mi yena ali, “Batili, na sina sa kueza ka sona. Ne nili kwani lisika pazula kale, mi neba pila kwani nako yani.” Mi neli Muzwale waka yomunde Ruddell yana li tisize kuna. Mi, kacwalo, lika zani kaniti Na itumela.

¹¹ Billy Paul natilo ni zibisa sesiñwi, linako nyana ze fitile, kuli mwahala kopano ye busihu bo, neba file linubu, ku lifa kuna. Na—Na itumela ka seo. Ne ni sabati kuli mueze cwalo. Na—Na itumela fela kwa lituso zamina, ni zeñwi cwalo, kono sani nesi sa tok wahali. Mi, kono, Mulena ami fuyole. Mwa ziba, mwa ziba, Bibele ibulezi kuli, “Ona momu ezelize ku babanyinyani ba, mu ezelize zeo ku Na.”

¹² Cwale, Ni bile ni ambola ku mina, fa Liñusa, ka kusepahala luli. Mi Na . . . Batu babañwi bakona kuba ni munahano wakuli—wakuli Ni nahana kuli Jesu u kataha kakusasana kamba busihu bwa kacenu. Na bona. Cwale, Hani buleli kuli Uka taha cwalo. Mi, hape, Hakulata hakoni kutaha sunda yetaha, mi ikona kuba mwendi isaho, ikona kuba mwendi myaha ye lishumi. Hani zibi nako Ya taha. Kono, kuna ni taba iliñwi yeo Ni bata ku . . . kamita mu i buluke mwa minahano ya mina, mube baba itukisize muzuzu kaufela kamba hola. Mwabona? Kuli, haiba Ha tahi kacenu, Wa kona kuba fa kamuso. Kacwalo mubuluke fela seo mwa minahano ya mina, kuli Wa taha.

¹³ Mi Hanizibi kuli ki nako mañi yekaba hola yaka fa lifasi le, mane hakuna niyomukana waluna yaziba. Mi hakuna ni alimuñwi waluna yaziba nako Ya taha. Niyena mane hazibi, Yena muñi, ka Manzwi a Hae Tota; Na ize, “Konji Ndate, fela, yaziba nako Ya kataha; mane ni yena Mwana hazibi nako Ya taha.” Kifo

fela Mulimu aka Mu luma ku luna hape. Kono lu libelezi Kutaha kwa Hae. Mi haiba Ha tahi mwa lusika lwa hesu, Wa kona kutaha ku lolutatama; haiba Ha tahi ku lwani, Uka taha ku lolutatama. Kono, ku na, Hakuna nako ni yekana yeni bona ye siyezi. Fela nitokwa . . . Ku na, ya kona ku ezahala ka muzuzu kaufela. Cwale, seo hasitalusi kuli . . . Seo hasitalusi kuli, cwale, kuli mubone mahalimu ha fetuha ni lika . . . Kwani hakona Kutaha ko Ni ambola fateni. Ni ambola kaza Kuungelwa.

¹⁴ Mwabona, Yena una ni Kutaha ko kulalu. U taha ka mabizo amalalu a bana. Natile mwa bulalu; Ndate, Mwana, Moya o Kenile. Mwabona, kaufela zona ki Kreste ya swana, Mulimu ya swana, ka nako kaufela. Cwale, lwa ziba kuli Na tezi ku to tisa misebezi yemilalu ya muhau; kutapiswa, kukeniswa, kolobezo ya Moya o Kenile. Li kaufela, ku Mulimu, li talelela mwa bulalu.

¹⁵ Mi cwalo kona Mwana tezi, pili, kuto liulula Munyaliwa wa Hae. Wa taha, sa bubeli, sina Kuungelwa, kutonga Munyaliwa wa Hae. Wa taha, lwa bulalu, ni Munyaliwa wa Hae, Mulena ni Mulena wa musali; kasamulaho, fani kona fo batu babañata ba kulubela kaza Kutaha.

Kono cwale Ha kataha nako ye, hakuna niyomukana konji bani baba itukisize kibona baba ka ziba Ha taha. Kukaba batu babaka kala ku lateha. Habana kuziba sesika ezahala ku bona. Baka ngiwa fela ku ikela, fa nako fela, mi baka kala fela ku nanuha ni ku lateha. “Kucinciwa mwa nako nyana, ka kukoba kwa liito.” Kacwalo muitukise fela ka seo. Ikaba kakusasa o sabisa ku latehelwa ki balatiwa ba mina, hakuna yakona ku ba fumana. Kana haina kuba nto ye maswe kuziba kuli i ezahalile mi mu siyezi? Kacwalo muipeye fela fapila Mulimu.

¹⁶ Cwale, sunda yetaha, haiba Mulena alata, la Mubulo leli tatama, kuzwa sunda la Mubulo le, haiba Mulimu alata, Ni issa lubasi lwaka ku kutela kwa Arizona ili koo ba kenela likolo, kutuha foo Ni—Ni ka kuta.

¹⁷ Cwale, Hani yangi kwande kwani . . . Hanina li sebelezo zekana za kuyoba ni zona kafani. Na hanibangi kamita mwa Arizona. Ni yanga kusili fela. Ni lwalanga musalaka kafani, la Mubulo leli tatama. Ni ka kuta kwanu hape. Nika nanuha kuzwa kwanu kuya kwa British Columbia. Ni kutela kwa Colorado. Ni kayoba mwa Arizona hape nako yeñwi bukaufi ni Kilisimasi, ka mizuzu fela ye likani, nako yeteletele nyana . . . mwendi mazazi amabeli kamba amalalu, kubeya lubasi hamoho, luka kuta kwanu ka linako za pumulo ya Kilisimasi, haiba Mulena alata, lukaba ni sebelezo ku yofita mwa sunda ya kukena mwa silimo sesinca kwanu.

¹⁸ Kacwalo he Ni teni kwanu, kaswanelo, sihulu. Nibanga kwanu ha lishumi kufita mwa libaka zeñwi kwani, kakuli haluna keleke kaufela kamba lisebelezo lifi kaufela kwande kwani, hakuna selunani kwande kwani, kacwalo, mwa mukwa wa kuba

ni sebelezo ya keleke. Sani kona sika sesi maswe ka sona. Hanina sibaka ko ni kona kulumba banake kuli bautwe Mañusa a, sina bana ba mina moba li utwelanga kwanu, mi—mi kacwalo bo kona butata bo lunani. Kono kaufela bona ba iketile mwa mibili. Ki koku omile, kwacisa, sibaka se si cisa, kono bana kaufela ba bonahala ku iketa hande luli mwa mibili. Hani inangi nako yetelele kwani kuli nizibe haiba ki kokunde kamba ha ki kokunde. Na, Ni mutu ya zamaya hahulu, mi Ni—Ni—Ni sepa kuli Ne ni pepezwi kuba muzamai.

¹⁹ Musalaka uni bizanga kuli... Naziba uteni mo, kacwalo Nika nga se kasamulaho wa keleke, mina kaufela mwaziba. Kana si bizwa cwani sani, mioya ye shimbuluka, kamba mioya yesa pumuli, kamba seo kaufela—kaufela, mwa ziba, mubu otiba? Kamba, Na kamita ni zamaya hahulu, ka manzwi amañwi. Mi Ni nyezi cwale, myaha ye mashumi amabeli-kazepeli, mi Na, fokuñwi, Ni hupulanga kuli Ni mueñi mwa ndu yaka, kakuli Ni lukela ku banga mwa misipili.

Kono Ni libelela nako yeo lukayo inafafasi mwa Naha ya luna zazi leliñwi. Kono cwale ndwa isa kolota, kacwalo halubeñi mwa litapelo.

²⁰ Musike mwa libala, la Sunda lelitatama kakusasana, haiba Mulena alata, muyotisa bakuli bamina ni baba zielehile. Mutahe ka ku itahanelo, mufumane fo mukaina, mi kaniti kuna ni sikwata sa ku lapelela. Lukaba ni kufa makadi a litapelo. Haiba hakuna amañata, haluna kufa makadi a litapelo, ikaba fela kuyema mwa mukoloko yemibeli kamba yemilalu ya batu, kamba sesiñwi. Kono lu—lu kafa makadi a litapelo kaniti, kacwalo lu kaeza ewalo mwendi ka hola ku sikaba kale sebelezo ya kamita, yeo Ni hupula kuli ibanga... Ikaba ka eiti, eiti kamba eiti-seti, bakafa makadi a litapelo; ku kwalula keleke, bakafa makadi a litapelo kakusasana la Sunda lelitatama. Mi he mubone mube kwanu bakeñisa ba... Muyotisa balatiwa ba mina, muba kenyé mwahali mwani. Kukaba mo kunde mi mokubata mwa keleke, haiba ba kula, mi lu kaeza kaufela se lukona kuli luba lapelele.

²¹ Ni itumezi, hape, ka nubu ya lilato.

²² Mi cwale lu kabala amañwi a Manzwi a Mulimu, busihu bwa kacenu, ni kuba baba itukisize kwa kezahalo ye ya Pata ya Hae hape ku lu tiseza Linzwi la Hae. Cwale, lwa ziba lwa kona kubala liñolo, kono Mulimu ulukela ku patulula taba yateñi. Mwabona? Lwa kona kunga liñolo, kono Mulimu ulukela ku patulula taba yateñi. Mi hamusweli ku apula cwale mwa Buka ya Jeremia, kauhanyo ya 2.

²³ Ni bata ku bulela kuli Ni tabezi kuba, hamoho ni, Muzwale Lee Vayle, muzwale yomunde ku Mulena. Mi Ni hupula fa, muzwale kwanu, Ni palelwa kuhupula libizo la hae, Muzwale Willard Crase. Mi Ni boni mizwale kuzwa kwa Arkansas,

Muzwale John ni babañwi, babazwa kwani kwa Poplar Bluff, ni Muzwale Blair. Mi, oh, Muzwale Jackson, mi Muzwale Ruddell, mi kacwalo babañata bene Ni—Ni hani sakona fela kuba . . . Ni lakaza kuli Ne ni ka bisa mutu kaufela ka libizo, kono fela ha Ni koni, mi mwa utwisisa. Muzwale Ben Bryant, Ni mubona uinzi fa; yena kamita ubata amen yaka mwa lilulu ha ninze Ni . . . Mutu ni mutu waziba Ben ka linzwi la hae. Uh-huh.

²⁴ Luna, hane nili mwa California nako yeñwi, Ne ni kutaza Liñusa kwa batu ba Baptist kwani mwa musindi. Neba nani tende yetuna kwani, ni mufuta wa ba Baptist babande baba cuulukile. Ne nisa utwi nihaiba “amen” kuzwa kai ni kai; mwa ziba, ne ni saba basali bene baipentile kwa lifateho. Mi he, taba yapili mwa ziba, Ne niboni mautu alikana sina *cwalo*, inza nanuha mwahalimu, ni mazoho amabeli amatuna, ni milili ye mi nsu inze i nyanganya kwani, kuhuwa kuli, “Amen,” banze bahuwa *cwalo*. Mi Na talimafafasi, Se nili, “Ben, kana u zwelela kai?” Kaniti yena nasweli kuutwa ma “amen.”

²⁵ Nibona musala hae inza mu talima, hanyinyani. Kulukile, usweli kufefelwa ki milili ya hae ye minsu, kono sani ki sesinde, mwa ziba. Usike wa bilaezwa ka seo. Ni latehezwi, kiyaka, kale kale koo.

Mi, cwale, musike mwa libala kulapela.

²⁶ Cwale halunze lu atumela kwa neku la butokwa la sebelezo, muhupule, haiba lu bala Linzwi le, fohe Mulimu uka fuyola Linzwi la Hae. “Halina kukuta ku Yena fela fela, kono Lika peta se Li lumezwi.” Mi Na ziba, ka kubala Linzwi, Ni kaba ya lukile kamita. Ha Ni bala Linzwi, Mulimu uka kuteka Linzwi la Hae.

²⁷ Cwale halu yemeni kwa kufa likute kwa Linzwi la Hae. Jeremia, kauhanyo ya 2, litimana za 12 ni 13 za Jeremia 2.

*Mu komoke, Mina . . . mahalimu, ka se, mi
mumbemuke hahulu, mu i cambaele, ku bulela MULENA.*

*Kakuli sicaba saka si ezize libi zepeli; ba ni tobohile
na liweluwelu la mezi a pilisa, mi ba ikepezi masima, ili
masima atibukile, a sa koni . . . a sa buluki mezi.*

Halu inamiseni litoho zaluna cwale.

²⁸ Mulimu yomunde, Linzwi la Hao li balilwe. Mi lu lapela kuli Uka kuteka Linzwi lani ni kufa kuluna busihu bo nguli kamba taluso ya Yona; halunze lu talima kwa mazazi afitile, Isilaele, kuba mitala, sina Bibele hai lu luta kuli lwakona ku bona sene U ezize ku bona hane ba utwezi Linzwi, kubona sene Uezize ku bona hane ba hanyelize Linzwi, ni ku ituta selu swanezi kueza. Kacwalo, lu lapela kuli U bulele ku luna busihu bo ka nzila ye ipitezi, kuli lukone kuziba mwa ku ikungela luna bañi mwa lizazi le, lene lu ituta kakusasana leo lupila kulona. Kakuli lwa likupa ka Libizo la Jesu. Amen.

Mwakona ku ina.

²⁹ Ni bata ku bulela busihu bo fa taba, fa nako fela ye—ye kuswani kaza: *Masima Atibukile*.

³⁰ Isilaele naezize libi zepeli zetuna. Mulimu naize neba sikuluhiile kuzwa ku Yena, yena Liweluwelu la Bupilo, mi neba ikepezi masima kuli banwe kuona. Cwale, yeo ki taba luli.

³¹ Libaka le Ni hupulezi toho ya taba ye neli kuli ika zamaelela ku sene Ni bulela kakusasana wo, kaza hola yeo lupila ku yona, ni Libaka le lusweli ku ikataleza.

³² Mi lu talima ku Isilaele kuba mutala, kuli, seo Mulimu nali sona, Yena kamita ulukela ku siala ya swana. Mi kuna ni sika silisiñwi fela seo Mulimu abile akuteka, sani ki, nzila ya Hae yeo A lukiselize batu. Mi hane ba zwile mwa nzila yani cwalo, mi Mulimu nasika tabela, mi Mulimu naezize kuli batu banyande bakeñisa ku keluha kuzwa ku sa Na ba bulelezi kuli ba eze, hakuna taba kamba neli sikamañi.

Yena mane na bafile mulao, “Usike waswala, usi swalí, usike wa lika.” Mi haki ka bumaswe bwa kueza cwalo, kono ki bumaswe bwa ku sa utwela sa Na bulezi kuli mueze. Mi kamita haku konahali kuba mulao kusina koto ya mulao. Kakuli, haiba hakuna koto, fohe, mulao hauna bunde kwanda kuli ube ni koto. Ona mulao!

³³ Cwale, lu fumana, sene ba ezize mwa lizazi lani si bonahala ku zamaelela ni se lueza kacenu, seo batu ba keleke basweli kueza.

³⁴ Cwale lu bona taba yenca fa. Ikona kuba nto yenca kwa batu babañwi, fani ha Na ize, “Mina muse, ba ikepezi, masima abona bañi, masima atibukile.” Cwale, mwendi babañwi ba mina hamuzibi seo lisima lili sona. Ki babakai baba ziba seo lisima lili sona? Kulukile, buñata bwa mina kaufela. Haiba mukile mwa hulela kwa hae, mwa ziba seo lisima lili sona. Na hupula Ni se ni nwile mauiyí amañata kuzwa mwani, ku—ku ziba seo li—li lisima nelili sona.

Ni kutalize mwa naha koo, mwa miluti ya likota, kone mukona kuka hemele yetezi ya mezi a mwa lisima ainelezi mwani, azwa mwa—mwa pula, mwa ziba, mi likala kubanga la kale nyana. Mi—mi cwale mauiyí ani, mwa nako ya busihu, za kena ku lona. Mi kacwalo Naziba seo mezi a lisima ali sona.

³⁵ Li—lisima ki si—si baka, ki sika sesi katilwe mwa mubu, kunga sibaka sa liweluwelu. Ko batu basina liweluwelu, mi banga li—li lisima. Mwa manzwi amañwi, lisima ki sika sa ipangezi mutu kamba mungomo wa ipangezi mutu obeilwe mwa mubu, seo mutu akatile, kuli abuluke mezi, ku—ku itusisa ona. Babañwi ba kubona ba itusisa ona kuba mezi aku tapisia, mi babañwi ba itusisa ona kuba mezi akunwa, ni linzila ze shutana, hakulata. Mezi kaufela fokuñwi, one lu banga niona, neli akwa lisima. Ne lu banga ni sika sa ku potolosa, kutinguluka, kutinguluka, kutinguluka, kuli mutise mezi fa

halimu; ne lu beyanga li hemele nyana ku lona, kuli luke mezi kuzwa mwa lisima.

³⁶ Kulukile, lu lemuha nto iliñwi kaza lisima kuli la shutana kwa liweluwelu. Cwale, lisima lika kala. Kakuli—kakuli—kakuli lisima halikoni ku italisa ili lona. Ku cwalo ki—ki... Halikoni ku sepiwa. Hamukoni ku itinga fa lisima. Lona li itingile fa pula yesehula ka mbumbi kamba ka maliha, kaufela seo likona.... Kamita, mwa nako ya maliha fani litwa ni pula hai taha, mi kipeto lisululela mezi mwa lisima. Mi haiba halibi ni mezi ani, konakuli hamuna—hamuna kuba ni mezi. Ku felile—ku felile... la omelela. Mi halikoni ku italisa. Lisima la kale halikoni ku italisa lona liñi. Li nganga mezi alona kwa—kwa pula hai nela.

³⁷ Mi Ni bata kuli mulemuhe taba yeñwi kaza lisima. Kamita, mufumana kuli, kamba nzila yeneli kwa sibaka saluna, ki lisima.... Kamita sisihete sibanga sesituna habeli kufita ndu, mi kamita li amuhelanga mezi alona kuzwa kwa sisihete, kukena mwa lisima. Na hupula lisima lani la kale kafale, cwale halise li... kono cwale—cwale mapaiyi ya ku yubisa mezi ateni a i beiwa ku lona, niteni, kuzwa fa sisihete. Litalanga ku zwa fa sisihete.

Kacwalo he mezi akuka kuzwa fa situwa sa sisihete; koo, lifolofolo kaufela li hatikela kwa matuko a mandamino, mi masila kaufela amwa patelo azwelela fa halimwa sisihete, mwa linako za linanga. Mi cwale mezi azwa fa situwa kuto suluhela mwateni, kukena mwa mukokolombwa wa i katezi mutu, kuzwa fo akena mwa misima ya mutu, kuzwa fani abubela mwa lisima laipangezi mutu. Mi haiba hamuna busafa, Hanizibi se mu nani, hamu nani lisima. Eeni, sha! Kaufela ze ki za ipangezi mutu, mi ki leli masila molikona kubela.

³⁸ Mwa ziba, nelu bizanga kuli.... Ne lu banga ni lisila la ku hamulisa masila ku lona. Kana mwa ziba seo nesili sona? Nelu beyanga lisila fateni, kuli luhamule mawiliwili ni lika zene zwelelanga fa halimu a—a lishete, ni kutinguluka sibaka kaufela, ni kusela kuzwa fa sibaka sesiñwi kuya ku sesiñwi, kukena mwa lisima. Mi nelu beyanga fateni fela—fela lisila la ku hamulisa masila fateni, ili kuswasa ona—ona mafumi one lukona. Kono, sani nesisa sefi masila kaufela, nesiswasanga fela lika zetuna zene wezi mwateni. Liñanya lakona kuwela mwateni, kono lwenge lwa liñanya nelu sialanga mwa mezi. Kacwalo, neli—neli butata luli hamuna ni lisima la kale la masila.

³⁹ Mwa mazazi alikani, mutuhele mezi ani ainelele mwani, mi aba asa kuki. Mutuhele kuli mezi ainelele mwa lisima, afetuha asa kuki. Mi akatala fela li—li limbotwe, ni mikolozwani, ni linoha. Mi neluli bizanga kuli ki “mawili-wili,” amanyinyani cwalo.... Hanizibi kamba kuna.... Haki likokwani, zona ki.... Na hanikoni, Na hanizibi mo mu li bizeza. Kono lika zeñwi ze nyinyani likena mwa mezi, zene—zene lu bizanga kuli mawili-

wili. Mwa ziba seo sili sona. Ki babakai ba baziba se Ni bulela kasona? Oh, kiñi, luli, mina ba naha ye kaufela mwaziba. Litalanga fela mezi ainelezi, mi cwale lika likokwani ze tabela mezi ainelezi likena kutoina mwateni. Zona kaniti za kenanga kuona, kakuli ki mezi ainelezi. Mi kakuli ki ainelezi, ahohele lifolofolo mwateni ze tabela ko kuna ni miinelo ye inelezi.

⁴⁰ Mi mane sekuswana sina likeleke zaluna kacenu. Ni sepa kuli luse lu siile... Silisiñwi sa libi zetuna seo keleke i ezize kacenu, nto yeswana fela sina Isilae nako yani, ne i Mu siile, ona Sibuba sa Mezi apila, mi ba i katezi masima a batu fela. Mi li fetuha sibaka sa mapilelo a lika kaufela ze lata mufuta wa mezi ani. Mikolozwani, limbotwe, ni mifuta kaufela ya likokwani ze masila, ne lipila ku lona, kakuli ki mungomo wa ipangezi mutu. Mi mwa mungomo o kona mo ku pila lika ze, mufuta wo petehile wa mutala wa likopano zaluna kacenu.

⁴¹ “Cwale,” mu li, “Muzwale Branham, kiñi ha ubulelanga hahulu ka batu bani?”

Si lukela ku si bulela katata. Si lukela ku sibulela ka kutiya. Musabe kuzona, kakuli mafelelezo lika panga nombolo ya sibatana. Muhupule, yani ki Niti! Ikaba nombolo ya sibatana. Likopano lika eteleta kuyona luli. Imwa musipili wa yona onafa cwale, ku hapeleza, ka mata.

⁴² Mutualime mwa mpi ya kale ya Siroma. Sani kona luli sene si ba isize kwa siemba sa kalimelo ya tumelo. Lu fumani kuli hakuna mutu ya ka kona kuleka kamba ku lekisa kusina nombolo ya sibatana. U lukela kuba ni yona.

⁴³ Kuna ni likwata zepeli fela za batu fa lifasi; bani baba na ni Liswayo la Mulimu, ni bani ba nombolo ya sibatana. Ki likwata zepeli fela, kacwalo mu lukela kuba wa siemba sesiñwi kamba sesiñwi. Ikaba ku nyaza tumelo, ona—ona nombolo ya—ya bulapeli, bulapeli bobu nyazizwe.

⁴⁴ Mi sikaba ni sibupeho sa sibatana. Mi lwa bala, lu fumana seo Rome neili sona, ili sona, mi kamita sikaba nga cwalo, ona nombolo ya... kamba, sibatana. Luli. Hakuna mukwa wa kuba ka mukwa usili. Rome!

⁴⁵ Mi kisikamañi seo Rome nei ezize? Nei cincizwe kuzwa kwa kuba Rome wa bahedeni kutoba Rome waza bu popu, ni mulao o ongaongilwe, mulao wa silundwamanje, wani no hapelelize mutu kaufela kwa bulapeli bwani kusicwalo neli ku bulaiwa.

⁴⁶ Mi ki taba yenca yeo United States ibonahala, mi ku swana sina ngu. Mi ngu inani manaka mabeli amanyinyani, liswanelo za naha ni za keleke. Mi kasamulaho nyana, yani hane ili ngu, lu fumani kuli cwale nei bulezi sina drakoni ni ku bonahalisa mata kaufela ao drakoni nei nani fa pila yona. Mi ni Bibele i lu bulelela kuli neba ize, “Ha lu ezeze sibatana siswaniso.” Siswaniso ki sika sesiswana ni sika sesiñwi. Mi lwakona ku sibona onafa cwale, mwa buino bwa sona bobu kwenuhile, keleke isweli ku ongaonga

Katengo ka Likeleke za Lifasi, ona taba yeli mata a Rome; mi ika hapeleza batu nto yeswana yeo Rome wa bahedeni naezize... kamba Rome wabu popu mone i ezelize. Kacwalo, hakuna nzila isili ni yekana, hakuna taba yeñwi. Kono yani kona Niti.

⁴⁷ Mi kikabakaleo Ni sweli ku omanya taba ye mwa lusika lwaka, mwa nako yaka, kakuli li lukela ku omanyiwa. Pizo sei taha, yali, "Akuzwe mwahali ku yena, sicaba sa Ka, kuli musike mwa ikabela kwa libi za hae!"

⁴⁸ Cwale, Ni swanisia zani kwa masima atezi masila, a busafa. "Yena ki Liweluwelu la Bupilo. Yena ki yena Mezi apila." Mi mutu usiya Sani, ni kuiketela bona bañi masima akona fela kubuluka busafa. Zani kona lika fela linosi zeo likona kubuluka. Mi sani kona seo likopano li ezanga; li swala lika kaufela ze tabela kuikopanya. Ba itakaleza kukenisa kubona ba bana ni masheleñi kamba baba kona ku tina mwa mufuta omuñwi. Hakuna taba kuli ki bo mañi, ko ba zwelela, baba amuhela, nihakulicwalo.

⁴⁹ Cwale lu fumana kuli, hape, kuli, ona nombolo ya sibatana ye fa. America, ki, nombolo yabu lishumi ka zetalu. Ne i pepilwe ina ni likalulo ze lishumi kazetalu. Neina ni ndembela yena ni linaleli ze lishumi kazetalu, mibalabala ye lishumi kaye milalu. Mi mane i bonahalela mwa Sinulo kauhanyo yabu 13. Mi America ibile musali kamita, ya pakiwa cwalo fa masheleñi amuwayawaya aluna. Neba toho ya ma Indian, fa masheleñi, ki siyemo sa musali. Lwa ziba cwalo, lwa ziba litaba zakale za yona. Liki kaufela, Mulangu wa Tukuluho, ni lika zeñwi kaufela, ona tukuluho... Siswaniso sa Tukuluho, ki lika kaufela, musali. Musali; nombolo yabu lishumi kazetalu. Mwabona? Cwale, ki—ki zende mwa lika zani.

⁵⁰ Mi cwale Ni nuhile ka sinulo yezwa ku Mulimu, kamba pono yamwa 1933, kuli lika ze supile nelika ezahala ku sikaba kale nako ya maungulo. Mi sani, iliñwi yazona, kuli, "Mussolini," ya nali kwani na tiloba mutu ya hapilikeza lika, "na taha kutoba muhapilikezi wa lika. Mi, hape, naka taha kuto hapa ni ku shetumukela mwa Ethiopia, mi naka nga Ethiopia. Mi Moya, No ize, 'Uka wela kwa mautu ahae.'"

⁵¹ Hani zibi kamba ku sa nani babañwi ba kale baba siezi mwa tabernakele, nahupula hane ni sweli ku bulela zani mwa Muyaho waba Redman ona kwanu hane lusweli kukutaza, lilimo, zeñata ñata ze fitile. Kana kuna ni alimuñwi mwa muyaho, busihu bo, babasiezi ku bene bali kwani kwa Muyaho waba Redman hane Ni sweli kukutaza sani, hane bana ni kuzusa ba N.R.A. mwateni, kwa mulaho kwani hene kusa busa Roosevelt mwa puso ya hae ya pili? Na sepa hakuna nihaiba alimuñwi mwahali mo. Kana kuna ni alimuñwi mo? Eeni, eeni, alimuñwi, kuna ni alimuñwi. Eeni, Bo. musala bo Wilson, Na ba hupula. Musalaka, uinzi kwa

mulaho. Ba babeli, kona baba siezi kuzwa mwa lusika lwani lwa kale mwa lizazi lani.

Kuli, hane baize ye N.R.A. neli nombolo ya sibatana, Ne niize, "Hakuna ni sesikana sa yona; koku tokwa. Nombolo ya sibatana ha i tahangi kwanu. I zwelela kwa Rome. Mi haikoni kuba nombolo ya sibatana."

⁵² Mi cwale muhupule kuli lika ze neli bulezwi. Kuli, "Adolph Hitler uka toba ni mafelelezo a sa zibahali. Mi naka tisa ndwa mwa United States. Mi nebaka yaha sika sesi—tuna—tuna sa lika zeñwi, sene baka pila kusona. Mi ona kwani ba America nebaka ba ni ku kukoma kokutuna, ka se." Mi neli mundandwe wa Siegfried, lilimo ze lishumi ka iliñwi usika kala niheba kuyahiwa. Mi cwale ne kuizwe, "Kono naka taha kwa mafelelezo; mi ba States neba ka wina ndwa."

⁵³ Mi cwale yabulela, kuli, "Kuna ni tukwata to tu lalu; ba muinelo wa Nazi, muinelo wa ku hapeleza lika, ni muinelo wa babañata." Mi se Nili, "Kaufela zona lika felela mwa muinelo wa babañata. Russia ika limiza kaufela zona, mwa muinelo wa babañata."

⁵⁴ Mi Ne niize, "Kutuha fo sayansi ikaba yetuna ni kufita, batu baka fita fa siyemo sa kuba ba baitutile hahulu, kufitela ba kaeza zeñata hahulu mane konji ba pange mota yeka bonahala sina lii, ikaba ni situwa sesiswana inge gilasi fa halimu, mi ika zamaiswa ki mata amañwi isiñi mukoboco." Mi bana ni yona mota yeo.

⁵⁵ Mi Ne niize, "Kutuha fo mitinelo ya ba hame ikawa luli mwa minelo ya lika, kufitela bafetuha maswabisa kwa linaha kaufela. Baka apala liapalo za baana. Baka zwelapili ku tubula libyana zabona kufitela ha baka fita kwatasi banze ba tinile fela tu nekunda cwalo, kipeto. Mi, ka kufeleleza, ba kato fita fa ku tinanga fela litali la feiga."

Mi cwale haiba mulemuha, mwa mutende wa *Life* magazine ya kweli yefelile, neba na ni musali ya apezi matali a feiga. Mi sani ki siapalo sa ku tinanga manzibwana, kamba mukanjo, ki zeba tinanga manzibwana; ze belela, wakona kubona kupunya kwa buse, kwanda litali la feiga fela lelipata fela siemba nyana sa mibili wa hae; kusina siemba sa fa maheta, kamba kahala, libyana ze sina mihala za kutapa ni zona, fa halimu azona, mibili oiponahaza. Mi mane kuli lika zani li ezechalile!

⁵⁶ Mi he se Nili, "Ne ni boni musali inza yemi mwa United States, sina mulena wa musali kamba sesiñwi. Mi nali yomunde ha talimwa, kono nali ya maswe mwa pilu ya hae. Mi kiha eza kuli naha iye ka muhato wa hae, ya kena mwa muhato wa hae."

⁵⁷ Mi Ne niize, "Ka kufeleleza, Na tilo ni bulelela kuli ni talime kwa Upa hape. Mi, hane Ni talimile, Na bona, kwa to bonahala sina, mo ne ku inezi, lifasi neli pazuhile. Mi kamo ne Ni kona

kubonela, nekusina sika konji tukota, mi—mi macwe acisa a mulilo na kashelizwe kwande kuzwa mwa mubu.”

Mi ze nelika ezahala kusika fela kale lifasi. Mi liketalizoho za zona kuze supile kale li ezahala, ka lilimo ze mashumi amalalu ka zetalu. Kifo he cwale, ku kutela kwa nako ya maungulo!

⁵⁸ Mi Ne ni bulezi kulwanisa milao ya likopano ona fani. Mi Nisa lumela ni cwale, busihu bo, kuli ki musima wa mezi, kuli ki sibaka moku matela lika ze masila. Hani koni ku lumela kuli Mulimu wakona kuisa sika se sicwalo mwa Keleke ya Hae, kakuli si lukela ku pepwa ka Moya wa Mulimu mi ni ku keniswa sisika biza wa kale kuli ki sa Hae. Ona Mubili wa kunutu wa Kreste, lwa kolobezwa ku Ona ka kolobezo ya Moya o Kenile.

⁵⁹ Eeni, mufuta o wa lisima kaniti ki mutala o petehile wa kopano. Mutu ya butali ulukela kutilima, mi asike akena ku zona, kakuli Mulimu ubonahalisize mwahala masika kuli Wa li lwanisa mi ha sikabe a belekisana ni zona. Sikwata kaufela... Nako kaufela yeo mutu akile ataha ni liñusa, sina Luther, Wesley, kamba bao kaufela, ni Smith, ni Calvin, ni bona; hane ba kalile likopano, Mulimu na kashelize lika zani kwa tuko mi asika lipotela ni hanyinyani mwa ancafazo.

⁶⁰ Mutualime mwa litaba zakale. Haku sikaba kale nako yeo Mulimu akile anga kopano, kuba ni ancafazo ku yona, hakuna. Kasamulaho, mwahala litaba zakale ni ka Bibele, ku bonisa kuli ki taba ya masila mwa meto a Mulimu, kacwalo Na hani tabeli kueza ni sesikana ka yona. Mi ki kabakaleo Na lwanisa. Ni lika ku zusa sicaba ku yona.

⁶¹ Lwa memiwa, sina Isilaele, kimo kuinezi cwale, kuli lu talime ku Isilaele ka mutala. Bona, hane ba pilile ni Liweluwelu lani, nebali baba iketile. Kono hane ba fitile fa kuikatela bona bañi masima, milao ya ipangezi mutu, mi Mulimu kiha ba siya ba lapami. Uka eza kuluna ze swana. “Bona ba Mu hanile, Ona Liweluwelu la Mezi apila.” Yani neli yona pilaelo yana na ni Mulimu ka bona. “Kueza sika sesiñwi sene bakona ku bulela, ‘Kana mwa bona selu ezize!’”

⁶² Cwale, ka nako ya—ya musipili wa Mushe; fani Mulimu, ka muhau, na bafile mupolofita, na bafile Siita sa Mulilo kuli si zamaye ni bona, na Si bonahalize ka lisupo ni ze komosa. Muhau neu tisize lika ze kaufela. Isilaele neisa tabela, neba boni mulao. Neba hanile muhau, kunga mulao.

Ona cwalo kona moba ezeza batu kacenu. Ba hana Linzwi, ba ikungela mulao wa kopano, kakuli mwa lizazi lani babata ku ikezeza ze ba lata ni ku zwelapili ka zona. Kono hamukoni ku eza cwalo ku Kreste! Mu lukela kutaha baba kenile mi baba kwaluhile, fakuli mube ku Kreste.

⁶³ Kusiya liweluwelu leli shelauka, bakeñisa mulao wa ipangezi mutu kamba lisima, munahane fela mutu yaeza ze cwalo? Mu nahanisise fela mutu yakona kunwa kwa liweluwelu leli

shelauka mezi, mi usiya sani kuya kwa lisima la i katezi mutu lelina ni limbotwe, ni mikolozwani, ni mawili-wili, ni lika zeñwi kaufela ku zona?

Mane haku bonahali fela ku iketa, kono sani kona fela seba ezize batu. Ba siile Linzwi, ona Liweluwelu la niti la makalelo a Mata a Mulimu, kunwa mwa lisima, ni kuikatela masima abona bañi. Ki nto yeswana sina mone ba ezelize nako yani, ba ezize cwalo ni nako ye. Babulela bali . . .

Na ize, "Ba Ni siile." Fa U ize, mo ku Jeremia 2:14, kamba 13, nitaluse. Na ize, "Ba Ni siile, na Liweluwelu la Mezi apila."

⁶⁴ Cwale, lwa bona seo lisima lili sona. Lwa bona seo li buluka. Lwa bona mo li pangezwi. Ki sika sa ipangezi mutu sesi zwa fa situwa sa masila. Ona mezi a suluhanga, asuluhela fa situwa sa masila, mi atapisanga fela situwa kufeletelela, ataha fafasi ku kukela mwa mikokolombwa sa ipangezi mutu, kufita mwa milapo ya katile mutu, ku suluhela mwa mungomo wa tomile mutu. Mi masila kaufela a kubukanelia teni, mi—mi likokwani, ni mikolozwani, ni limbotwe, ni lika za mwa liluli, sina cwalo. Mi, mulemuhe, zona ki lifolofolo ze masila; mawili-wili, ku ineleta. Mawili-wili hakoni ku pila mwa mezi akenile. Kambe akona kuina mwateni, akona ku li bulaya. A lukela kuba moku na ni mezi ainelezi.

⁶⁵ Mi cwalo kona mo kuinezi ka likokwani zeñata ze kacenu. Hamukoni ku pila mwa mezi amanca a Moya o Kenile. Ki kabakaleo ba lwanisa Linzwi katata, mi bali, "La itwanisa Lona liñi. Hakuna sesiñwi ku Lona." Kakuli ba lukela kuba ni mufuta wa lika ze inelezi ka mawili-wili mwateni. Kulukile.

Wani ki mufuta oswana ni limbotwe, ni mikolozwani, ni limbuluwe, ni zeñwi ze swana sina cwalo. Lina ni kucken mwateni kakuli ki mezi ainelezi mwa kasa, ku pila, kakuli ki sibupeho sa zona kuli lipile mwani. Mi hamukoni ku cinca folofolo konji pili mucince sibupeho sa yona.

Mi hamukoni kueza kuli mutu abone Linzwi la Mulimu konji pili sibupeho sa hae sibe sesi cincizwe; mi cwale sibupeho sa hae si mano cinciwá kuzwa kusali sona, kuba mwana Mulimu, mi mane Moya o Kenile utaha kuyena. Moya o Kenile kona ono ñozi Linzwi la Mulimu!

⁶⁶ Kacenu Neni ambola ni mulikanaka yomunde, Muituti Lee Vayle, yena ya liteni cwale. Mi yena ki muituti luli ya cuulukile, mi kacwalo kamita lu banga ni—lu banga ni zeñwi za lingambolo ka Mañolo. Baituti luli.

Mi nani buzize nako yeñwi ka seo Neni hupula ka ponahazo yapili ya Moya o Kenile, "Kana neli ku bulela ka malimi?" Seli myaha ye miñata kale.

Se nili, "Batili; hani boni seo."

Yena sali, "Nina ha Ni zibi," ali, "nahupula kuli mwendi Ni lutilwe cwalo." Ki hali, "Kana kisikamañi so hupula kuli sikona kuba sisupo?"

⁶⁷ Na li, "Sisupo sesi petehile kufitisisa se Ni kona ku hupula ki lilato." Mi kacwalo selu kala ku ambola ka sona.

Mi cwale Na hupula kuli sani nesi utwahalile hande luli kacwalo se Ni ipulukela fela sani, "Haiba mutu una ni lilato."

Kono zazi leliñwi Mulena, mwa pono, nesi ni tamuluzi luli. Mi Yena ali, kuli, "Ponahazo ya Moya neli bani ba bakona ku amuhela Linzwi," haki lilato, haki kubulela ka malimi, kono ki ku amuhela Linzwi.

⁶⁸ Mi cwale Muituti Vayle na ni bulelela, kuli, "Sani ki sa mwa Mañolo," na ize, "kakuli, mwa Joani 14, Jesu naize, 'Cwale Yena ona Moya o Kenile hauli ku wena, Uka patulula lika ze ku wena, zeo Ni mi lutilte, mi uka mibonisa lika ze sa taha.'"

Konakuli yani kona ponahazo ya niti ya Moya o Kenile! Ha sika ni bulelela kale mafosisa ni haisali. Kuli, "Ki ponahazo ya Moya o Kenile, ki kuya kona ku lumela Linzwi." Mwakona ku U amuhela.

Kakuli, Jesu nasika bulela kuli, "Moya o Kenile hause utile, muka bulela ka malimi." Na sika bulela kuli, Moya o Kenile hauka taha, muka eza lika ze swana sina cwalo. Kono Yena ali, "Uka nga kwa lika za Ka mi ami bonise zona, mi uka mibonisa lika ze sa taha." Kacwalo yani kona ponahazo ya Moya o Kenile, kuya ka Jesu Yena kasibili.

⁶⁹ Kacwalo maikuto a kaufela ni lika zeo batu banana mi basa pila ka zona, mwakona ku bona libaka leba ezeza cwalo. Mwabona, iba kopano, kamba kasa kaka iniselize mezi, mi hakuna kuba kopano yeka pangwa fa kusa... bwa Linzwi leli petehile la Mulimu. Haikoni kueza cwalo, kakuli hamukoni ku keta kamba ku ongaonga Mulimu. Batili, sha!

⁷⁰ Libaka ki kuli, muba ni batu ba bakona ku lumela Linzwi, mi haba kale fela kopano. Taba yapili mwa ziba, ka nako yekwana silimo kukaba ni sikuwata sa ma Ricky mwateni semu sike mwaba ni sa kueza ka bona. Baba ni bundume, mi hakuna semu kona kueza ka sona. Haki mulao wa Mulimu. Ha u cwalo, kacwalo luziba kuli taba yani i kwande. Ibanga fela lisima, mi iba sibaka koo mutu ni mutu uka keshebisa ka *se*, *sani*, kamba *sesiñwi*, kuikungela ma membala ku lona, kamba ku tuhelela batu kukena mwateni.

⁷¹ Lufumana kuli, mulao no kalile ka nako yeñwi, kwa mulaho mwa mazazi a ma Isilaele, fani hane ba katanga masima. Mi neku banga mutu ni sikuwata sa Bafalisi bene ba katanga masima. Mi neba nani ni muuna wa libizo la Heroda, mi nali yena mulemusi, mubusisi wa naha.

Mi sa taha kuto utwa kaza mutu yana sa bapali ni likopano zabona. Nali mupolofita. Mi nekusina mupolofita yana banga ni sa kueza ka likopano, kono na litoile. Mupolofita yo akala ku bulela kuli, "Musike mwa kala ku ipulelisa mwahala mina, 'Luna ni Abrahama kuba ndata luna,' kakuli Ni mi bulelala kuli Mulimu wakona ku fetula macwe a kuba bana ba Abrahama."

⁷² Mi batisa mutu ya cuukile kuli ba mu utwe. Mi muituti yona amuhile musala muhulwana hae, mi amunyala. Mi mutu yani kisikamañi sana ilo bulela fa pila hae? Neba hupuzi kuli uka keshebisa, ni kubulela kuli, "Cwale, muñaka, mina, muine fa pipula sesinde *fanī*. Mi ulukela kuba... Ni sepa mutile kwanu kuto ni utwa kacenu."

Joani naile fela ku libana ni pata ya hae, mi ali, "Haku swaneli kuli wena ube ni musali yo." Ona taba yapili yana bulezi, amu omanya ka sibi sa hae.

⁷³ Mwabona, likopano lipanga masa ainelezi koo baana ba pila ni basali, mi basali bani bazwelapili cwalo, mi ba kuta milili ya bona, mi batina tuputula, ni lika zeñwi kaufela, mi baipiza kuli ki Bakreste.

Kono Liweluwelu la niti, haleluya, la Mata a Mulimu, halikoni kuina fani, kakuli La akasheza kwande. "Kina Liweluwelu la Mezi a pila. Ba Ni siile, mi ba ikatezi masima abona."

⁷⁴ Cwale, liweluwelu la mezi a pila, lu fumana kuli, liweluwelu la mezi apila kisikamañi? Lufumana seo lisima lili sona, cwale liweluwelu la mezi apila ki sikamañi? Ki liweluwelu leli shelauka.

"Liweluwelu leli shelauka, kisikamañi seo, Muzwale Branham?"

Ki lisima leo kamita lizwelela mwatasi mi li kasheza mezi alona kwande. Abuba ka nako kaufela. Lona la iponela za lona liñi. Kamita ki amanca mi akenile, liweluwelu leli shelauka, liweluwelu la mezi a pila. Isiñi a shwile kamba ainelezi. Ki apila, nako kaufela acinca, ka nako kaufela atisa sika sesinca, ku zwelapili cwalo, azwa kwa makalelo alona. Li fumana makalelo alona kwa—kwa liñope la lona, sika sesili... isali liweluwelu la mezi a pila asweli ku kashezwa mwa halimu. Aikenisa ili ona; akenile, a masweu, mezi akenile. La iponela za lona linosi; hamulukeli ku libeleta mezi a pula kuli litale. Kamita lona la shelauka, lifa mezi alona mahala fela. Hamulukeli ku a cokoca, ku ashuta, ku apikulusa, kamba ku a kopanya. Fela ki liweluwelu la mezi a pila.

⁷⁵ Mwa ziba, amukaba ni masima a kale a, muka tokwa kuli mu a yube ni ku yuba ni ku yuba, ni kucokoca ni lika kaufela, fakuli muzuse mezi ainelezi ku ona. Huh!

Kono Liweluwelu la Mezi apila Lona li afa fela, mahala, hakuna ku yuba, ku akopanya, sika kaufela. Oh, Ni tabile ka Liweluwelu lani! Eeni, sha!

⁷⁶ Lona halitokwi sefa ku Lona, fa kuzusa likokwani ku lona. Kakuli, Li tungile hahulu mwatasi, mwani mwa Licwe, kufitela haku sike kuba kokwani mwani.

Halitokwi kuba ni lisila la tuto ku Lona, yani ki niti, butali bobuñwi bwa mulao oipangezwi ki lifasi; kuli bu mi bulelele, fapila muluti wa lipulumuki, kamba wakona ku kutaza kamba kutokwa. Halitokwi nihaiba lisila la masila lani leliñwi ku lepelela ku Lona. Liki li kasheza kwande musa likwahela fela fateni. Hamukoni kueza cwalo. Lisima lateni lona la welauka, ka nako kaufela. Musa beya fela lisila leliñwi ku lona, liki wela kwa neku le kamba kwa buse kokuñwi. Lona halina nako ka masila a likopano ku lona.

⁷⁷ Lona halitokwi ku lisefa, hakuna sefa, hakuna kucokoca, hakuna kuipulaisa, hakuna sika kaufela. Lii inezi fela fani, inze li shelauka. Halitokwi ku itinga fa mezi a pula ya masehulo kuli litale. *Pula* ki “li ancafazo,” koo Liweluwelu lani... Kwani ki kwa Liweluwelu la Bupilo. “Ko ku inzi Situpu, li mbande lika kopana.” Hamu lukeli ku hapeleza ancafazo; hamu lukeli ku hapeleza sika kaufela. Sika fela semu lukela kueza ki kutaha kwa Liweluwelu. Lona kamita litezi mezi amande, mi amanca, mi haana mafelelezo ku Ona. Ona azwelapili fela ku shelauka.

⁷⁸ Hamu lukeli kuya kwa lisima, ni kubulela kuli, “Kihande, haiba inela ni ku tapisa situwa sa sishete, lukaba ni sesiñwi sa kunwa.” Mwabona? Mawi, mawi! Haki se. Liweluwelu lani li sweli ku sululela fande ka bunde, mezi abata ka nako kaufela. Mwakona ku itinga ku lona. Hamu lukeli ku bulela kuli, “Kihande, Nika ya kwa lisima le la kale. Nelu nwanga ku lona, kono ha isika nela fa nako yetelele. Na mi bulelela, lakona ku oma.”

⁷⁹ Kona mo inezi milao yeñwi ya ipangezi mutu cwalo. Mwa kona kukena ku yona, haiba muna ni sika sesituna sesi ezahala, sikwata sesituna sa ku lekisa lika cwalo, kamba—kamba sika sesiñwi sesi ezahala, mukiti o mutuna ni lika ze ezahala, lipapali za bunko, ni lipapali mwa sibaka safafasi, ni lika kaufela, mwakona ku fumana ndu ye tezi.

Kono ha myua kwa Liweluwelu lani leli shelauka, kamita, batu ba kwani banze ba ikungela amande, ili mezi abata. Mwakona ku itinga ku Ona! Muli, “Haba sikaba kale ni ancafazo fa lilimo ze lishumi.” Haiba mupila ka Liweluwelu lani, Lona lina ni ancafazo yenze zwelapili.

⁸⁰ Sina muuna yomunyinyani wa kale wakwa Welsh mwana bulelezi. Kamba, nako yeñwi hane bana ni ancafazo kwa Welsh hane isweli ku ezahala, nekuna ni makwambuyu bene ba zwa kwa States. Babañwi ba ku bona Baituti ba batuna ba za

Bumulimu nibona neba ile teni kwa Wales, kuyo batisisa kikai mi ni sene siezahala. Kacwalo nebana ni likola zabona ze wile, ni likuwani zabona za kucombeka, mi nebasweli ku zamaya cwalo mwa mikwakwa.

Mi fa neku zamaya mupokola inza ikela, inza pikulusa mulamu wa hae wa kale mwa lizoho la hae, inza liza muloli, "Fa sisifapano fana shwezi Mupulusi waka, ona kwani kaku kenisa libi zaka Na lila; mi Mali ato toziwa mwa pilu yaka, kanya kwa Libizo la Hae," inza zamaya mwa mukwakwa.

Kacwalo sebali, "Yo ubonahala kuba muuna wa bulapeli. Luye luyo mubuza." Mi se bali, "Mushemi!"

Ali, "Eeni, sha?"

Kiha sali, "Lutile kwanu lu zwa kwa United States. Lu batu baba lumilwe. Lutile kwanu kuto batisisa kaza ancafazo mwa Welsh, ye bulelwa. Lu Baituti ba za Bumulimu, mi lutile kwanu kuto ibona." Yena sali, "Lubata kuziba ko inezi ancafazo ye, ni ko i ezahalela."

Kiha li, "Muñaka, mu fitile. Kina ancafazo ya kwa Welsh." Amen! "Ancafazo yakwa Welsh inzi kuna. Mo kona moi inzi."

⁸¹ Cwalo kona mo kuinezi hamu pila ka Liweluwelu lani la Mezi apila. Yona ya pila ka nako kaufela, ku shelauka fa ni fa, mi fa ni fa. Hakuna mafelelezo ku Yona. Isiñi, "Muye mu yo bona haiba mezi amañwi, kambe neluna ni pula kwanu isi kale hahulu," zani haki zona. Ki Liweluwelu lani la Mezi apila. Sina ha Ni bulela, Lifa Mezi a Lona mahala fela.

⁸² Hamu lukeli kubeya teni lisila ku Lona, kuli mufumane; masila amañwi a lituto, musika muluma kale kuli ayo kutaza, ni kubona haiba ubulela manzwi ahae ka swanelo, ku abulela hande, haiba aitusisa mabizo ni tuloka ndina twa hae, ni zeñwi cwalo, ni manzwi atalusa mabizo. Babañata ba bona haba zibi seo bali sona, kono upila kwa Liweluwelu ka mukwa oswana, mwabona, nto yeswana.

⁸³ Lona hali lukeli ku itinga fa pula ya masehulo, kuli litale, kamba ona pula yamwa sibaka, ku lona. Hali lukeli kueza cwalo, kakuli mata alona ni kukena kwa lona ku fumaneha ku lona liñi. Kwani kona ko kuna ni Linzwi, Mata Alona Liñi! Mutu haiba uka Amuhela mwa pilu ya hae, Lina ni kukena kwa Ona. Lina ni mata Alona. Li lukile mwa Linzwi Lona liñi, litisa fela Bupilo.

⁸⁴ Isilaele neisabela kwa hule ni Lona, nebaka kena mwa butata. Nako kaufela hane ba keluhelanga kwahule kuzwa ku Lona, nebakeni mwa butata.

Taba yeswana sina molu ezeza cwale. Mi ancafazo haizwa ku Sani, konakuli haku sana bunde. La ikatelanga lona liñi misima, mi, kamba masima amañwi ainelezi, mi ki lani la zwelapili.

⁸⁵ Kono Yena kamita naba tusanga. Ku bilaela fa Liwate leli Fubelu, mi cwale hane ba bilaezi... Ibo, mwa lika zani kaufela,

Na sepe size, na bafile sepeiso. Naka ba fetuhela ona kwani, ka nzila yene luka talima ka yona; kono Na sepe size kubanga kuba silisa mwa buse.

Kisikamañi sa Na ezize? Bani bana ba Isilaele, Na ba lukiselize Siita sa Mulilo ni lika kaufela, kwa ponahazo, mupolofita wa bona. Mi baba zamaisa kwande kwani kwa liwate. Mi, kamita, kuna ni butata kulwanisa Sani. Mi kiha kutaha Faro ni mpi ya hae. Mi mwa ziba seo Mulimu nae size? Na tilo kwalula fela lisima, leli fubelua lani lisima leli inelezi.

Ona Nuka Yeshwile kona ye maswe hahulu mwa lifasi. Yona kaniti i shwile. Ki leli inelezi. Hakuna sesi kona kupila ku yona.

Mi aikwalula ni kuba lukulula, kwa neku leliñwi. Kiha ba isa kwa sibaka kone basike ba tamiwa ki lika ze cwalo.

⁸⁶ Mwa lihalaupa, neba fumani kuli mingomo ne i sakoni ku sepiwa; nese iomile. Neba fumani cwalo, bay a kuzwa kwa musima omuñwi wa mezi kuya ku omuñwi. Fani hane bali mwa lihalaupa, neba shwa tala kuisa lifu, bakeñisa mezi a kunwa. Mi nebaka taha kwa singongolo se kwanu, musima wa mezi; nei omelezi. Se bay a kwa sibaka sesiñwi; nei omelezi. Neba hupula kuli haba sana ku ba ni mezi.

Mi cwale mwa libaka ze sa latiwi za mwa lihalaupa, neba fumani mezi. Neli mwa licwe. Neli mwa licwe. Sibaka sesi maswe seo mutu akona ku fumana mezi kaufela, ikona kuba mwa licwe leli omelezi mwa lihalaupa. Kono, mwa bona, Mulimu uezanga lika ona cwalo. Mwa sibaka se si sa tabisi, mwa linzila ze sa zibahali. Sani kona selubile ni sona kamita.

⁸⁷ Bona ba hupula kuli mulukela kuba ni likopano zetuna, hamoho, ni ku ba tuhela kuli ba tahe hamoho kaufela ni kuba ni kusita kokutuna hamoho, ni zeñwi cwalo, ni kunga ba baeza likiti kuli bakopane, ni ze kaufela sina *cwalo* kuli babe niancafazo.

Fokuñwi Mulimu ushimbanga mushimani yomunyinyani yasa zibi nihaiba ABC ya hae, mi hañata mwahala batu baba sika ituta babasa zibi lizoho la silyo kamba nzohoto ya bona, Wakona ku nanula ancafazo yekona ku nyanganyisa lifasi. Na ezize cwalo mwa nako ya Joani. Na ezize cwalo mwa linako zaba polofita. Hakuna niyomukana wa bona, sina halu ziba cwalo, ya kile aba ya itutile, kono Mulimu nakona ku muswala ni ku eza sesiñwi ka yena.

⁸⁸ Mwa Licwe le kwazwa mezi. Nali yena Licwe. Mi A laela Licwe le, mi lilukela ku natwa. Mi Kiha litisa buñata bwa mezi, amanca, mezi akenile ku mutu kaufela yana kona kunwa. Na pilisize yo kaufela nakanwa ku Ona. Taba ye zamaelela ni Joani 3:16.

*...Mulimu ulatile hahulu lifasi, kuli mane ufile
Mwana hae wa libanda, . . . yo kaufela ya lumela ku yena
asike ashwa, kono abe ni bupilo bobusafeli,*

⁸⁹ Mulimu kiyena yana natile Liewe lani, fa Kalvari. Katulo ya luna neiwezi Yena fa halimu, kuli kuzwa ku Yena ku tahe Moya wa Bupilo ono kafa mina ni na Bupilo bwa Kuyakuile. Yani kona nguli ye petehile ya Yona, kwani mwa lihalaupa le.

⁹⁰ Neba sa ikataza ku hoha, kukata, ku pikulusa, kamba sika kaufela; muce fela kwa nzila ya Hae ye lukisizwe, mahala. Fani, nebara tokwi kuka amwa siliba. Neba sa lukeli ku ashuta ni hemele. Nebara lukeli ku potolosa sika kuli bake. Neba nwanga fela ku ona.

Mi sani kona sesi liteni fela cwale. Hamulukeli kuikopanya ku sesiñwi. Hamulukeli kuya kwa aletare ni ku beleka sika sesiñwi, ku apompa. Hamulukeli ku bulela manzwi ku kutakela ku kutakela ni ku kutakela, kufitela mulyangana mwa mushobo. Taba fela yemu lukela kueza ki kuli muce fela ku Yena, mahala, nzila ye lukisizwe ya Mulimu. Hakuna ku ikataza, hakuna kukasha, hakuna sika kaufela; muikungele fela ku Ona, mahala. Hakuna semu lukela kueza; kono muikene fela za Ona. Sani ki, kulumela fela Cwalo. Sani kona fela se Ni kona ku bulela ka lona.

Neba sina sa kueza ka lona. Nekusina kuli ba kate. Nebasa yangi kuyo lila busihu kaufela, ka ona. Neba nwa fela ku ona; neli natile mi neli itukisize. Yani ki niti.

⁹¹ Ni sweli kutalima muuna cwale, yainzi kwa mulaho a sibaka kwanu. Ni hupula hane ni mubulelala kuli, fa sintolo sesiñwi sa kale sa masikono zazi leliñwi, bukaufi ni sicelo.

Mi kiha li, “Kono Na hani yomunde.”

⁹² Na li, “Na ziba ha uyo munde.” Mi Na li, “Ni na, hani yomunde.” Kono se Nili, “Wena utalima ku soli sona. Mi utuhele kutalima ku soli sona, mi utalime ku seo Ali sona.”

Yena ali, “Kambe Ne ni ka tuhela fela kwai ye, Muzwale Branham, Ne—Ne—Ne ni kaba Mukreste.”

⁹³ Na li, “Usike wa li tuhela. Ulika kuba yomunde mi utahe ku Yena. Nasika to pilisa batu babande; Na tilo pilisa batu baba maswe bene baziba kuli ba maswe.”

Yena ali, “Kihande . . .”

Se nili, “Muteeleze, hau lati kuya kwa lihele, nji cwani?”

Yena ali, “Batili.”

⁹⁴ Se nili, “Kihande, hamulukeli kuya kwateni. Na shwile ili kuli musike mwa lateha.”

Kiha li, “Kisikamañi se Ni tokwa kueza?”

Se nili, “Hakuna. Kinto fela ye bunolo cwalo.”

Kiha li, “Kono haiba Na kona . . .”

⁹⁵ Se nili, “Kifo cwale, kukuta kwa kwai yani hape. Mu tuhele ku nahana kaza kwai. Muhupule fela, mu nahane ka Yena, sa Na ezize, seo Ali sona; haki seo muli sona. Hamu ba bande; mi nemusi cwalo, mi hamuna kuba cwalo. Kono, seo Ali sona, Ki Yena!” Mi se Nili, “Cwale, taba fela iliñwi ye mulukela ku eza; haiba Na ngile sibaka sa minafafasi kwani, mina mu amuhele fela ka kulata Sa ezize. Taba fela yemu lukela kueza ki ku amuhela.”

“Kiñi,” na ize, “zeo libunolo. Ni ka eza cwalo.”

⁹⁶ Se nili, “Kanuka kika kwanu.” Mwabona? Ni mu tisize kwanu mi ni mu kolobelize ka Libizo la Jesu Kreste.

Batu babañwi ku bahabo yena bateni kwanu, mi Na—Na ziba neba utwile hande hane ni eza cwalo, kono Ne ni ziba sene Ni eza. Ne ni boni sesiñwi sa niti ku muuna yo. Ne nikona kubona kwani, mi Na munga ni ku mu kolobeza ka Libizo la Mulena Jesu.

Mi, fani hane lu ezize cwalo, neku sikanga nako kuzwa fani kufitela ha Ni ya kwa ndu ya mwana hae. Nelu boni a—a pono ya kota ha ilobeha kwa sibaka sesiñwi, mi muuna yani awa, mane abata ku lobeha mukokoto. Neni mu isize kwa sipatela. Mi busihu bwani Mulena na patuluzi, ku na, ani neli mafelelezo a likwai.

Kacwalo ka lelitatama nabata kwai nyana. Na li, “Ni ka mulekela sipokisi ni ku mu iseza. Mu libelete fela mi mubone, mazazi ahae a kwai afelile.” Ha sikabe azuba nihaiba iliñwi kuzwa fani, mi ha tabeli nihaiba iliñwi kuzwelela fani. Mulimu!

⁹⁷ Mwabona, taba yapili ye mulukela kueza ki kutaha kwa Liweluwelu lani. Mu lukela kutaha kwa Mezi ani, mulemuhe kuli hakuna semu kona ku eza. Ki Sa mi ezelize. Hamu lukeli ku kata; hamu lukeli ku ikataza ku a zusa fande; hamu lukeli ku tuhela se; hamu lukeli ku sani. Taba fela yemu lukela kueza kikuli muye kwani mi munwe. Ku felile. Haiba mu na ni linyolwa; hamunwe!

⁹⁸ Cwale, Nali yena Licwe. Mulimu na Mu natile bakeñisa luna, mi ki Ha sato lufa mezi kabuñata a kenile, mi amande. Usa eza cwalo, ni kacenu, ku mutu kaufela yaka lumela. Wo ki muhau wa Hae, ka niti, kwa sicaba sa Hae, luna.

⁹⁹ Kuna ni sesiñwi cwalo kafani, sina batu ba kacenu, ba itukiselize ku amuhela seba kona kunga, kono haba lati kuba ni sebelezo kaufela ka ku kutiseza. Isilaele na itukisize ku—ku nwa kwa licwe cwale, kono neba sa lati kufa Mulimu sebelezo ya Hae yene Mu swanelia.

¹⁰⁰ Mi Yena kamita walufanga sebelezo. Mwa ziba, halukoni nihaiba ku buyela kusina Yena. Halukoni ku buyela kusina sebelezo ya Mulimu. Cwalo kona molu itingezi ku Yena. Mi, kanti, sika lu aba fahali kueza liemba zepeli haiba lu lika kueza cwalo, lu lukela kueza sika sesiñwi ka Yena. Ulu kupakuli lu eze

sesiñwi, kuyo potela mutu, kuya kuyo lapelela yomuñwi, kuya kuyotusa yomuñwi, mane li batanga fela ku lu aba fahali, ha lueza cwalo. Kono halu lati ku eza sika kaufela ku Yena kuba sebelezo.

¹⁰¹ Pilaelo ya hae neli kuli, “Ba Ni keluhile, Linzwi; mi ba amuhezi lisima leli tibukile, ka mukwa wateni. Ku amuhela... Ba Ni keluhile, ona Liweluwelu la Bupilo, ona Liweluwelu la Mezi a Bupilo; mi neba lakaza kamba kunwa kwa lisima leli inelezi.” Kana mwakona ku nahana fateni?

¹⁰² Mwakona ku nahana ka mutu cwale, kuli, *fa* kuna ni liweluwelu leli shelaukisa mezi amande, akenile amasweu, azwelela mwa pilu ya macwe, ona mwani mwa tasi a mubu, ni zeñwi cwalo, abata fela kamwa kona kubela; mi yena uya kwa kunwa mwa lisima kafani, mezi azwile fa halimu a situwa, ni litebule, ni litebule zeñwi za mwa sibaka fa kaufi? Mi asuluhela mwa lisima la kafani, ili koku suluhela mezi ka mikokolombwa mwateri, kuzwa fa sishete, litebule ni lintolo, ni lika kaufela lisululela mwa lisima, mi cwale lubata ku amuhe... kana luka nwa ani lusikaya kale kwa liweluwelu leli shelauka? Kukaba sesiñwi sesi fosahalile mwa minahano ya mutu ya cwalo. Yeo ki niti.

¹⁰³ Mi cwale muuna kamba musali aka ikungela kopano kuba mayemo ahae, yaka lumeleza kukuta milili, kutina tuputula, kuipenta, lika zeñwi ze kaufela, ni lika ze nyinyani za-za mukoloko, ni za ku zwelapili ze kaufela, ni kuya kwa ku bapala za mbola, ni-ni za bukuba zani kaufela kwani, mi akone kuina ni zona; mi ueza ka kushutana ni Linzwi la kale la Mulimu leli katangafafasi ni kupumbula, ni kupanga likalibe kuzwa mwa basali, ni kunga ni kuba eza kuli ba apale hande ni kupila ka swanelo, linga mishanga ni kwai, ni kukonka ni ku lwaha, ni kupuma ni kuuzwa, kuzwa ku mina, ni lifasi kaufela kumina, ni ku mifa Sesiñwi sesili kukula koku petehile. Kikabakalañi muuna kamba musali aka eza lika ze cwalo kuli abe ni mbombolelwa? Ukona kuba cwani ni mbombolelwa kuzwa ku zani?

¹⁰⁴ Kana ukona cwani kunwa mezi amanca kuzwa mwa lisima leli ineliselize mezi? Kana mutu uka eza cwani... Haiba mutu uya kwa lisima leli inelezi kuli ayo nwa mezi, kanti kuna ni lisima leli shelauka kokuñwi, kana muka bulela kuli, “Kuna ni sesi fosahalile ni munahano wa mutu yani.”

Mi haiba musali kamba muuna ha ya kwa sibaka sesicwalo kuli ayo bata mbombolelwa, kuna ni sesi fosahalile mwa moyo wa mutu yo. Haba lati Linzwi. Ku bonissa kuli sibupeho sa bona isali sa simbotwe, kamba sa simbuluwe, kamba sesiñwi, yani ki niti, sesiñwi sa sibupeho sani sesi tabela buino bwa nambwanyaleka mwa lisima, kakuli lika za mufuta wani

halikoni ku pila mwa siliba sa Mezi amanca. Habakoni kueza cwalo; ki Mezi amanca. Habakoni kueza cwalo.

¹⁰⁵ Cwale, pilaelo neli kuli, “Neba Li siile.” Mi kacenu lu ezize lika ze swana.

Cwale mutualime musali fa lisima. Kihande, natile kwa lisima la Jakobo, mi nakelanga mezi ona kwani kamita, fa lisima la Jakobo. Kono lisima la Jakobo, kopano, molukona kuli bizeza, kakuli na katile amalalu aona; mi le nali katile. Cwale, nabile ni likande lelituna. Musali ali, “Cwale, ndata luna kiyena yana katile lisima le, Jakobo. Na nwanga ku lona, ni likomu za hae neli nwanga ku lona, ni lika kaufela. Kana haki nto yende yeo?”

¹⁰⁶ Yena ali, “Kono mezi oka mwa lisima le, ukaba ni linyolwa hape, ukaba ni kukuta kwanu kutoka hape. Kono,” ali, “kakuli Mezi o Ni ka kufa ki Liweluwelu, ki Kasa kanze ka shitula lika kuzwa mwatasi, mi ha ulukeli kutaha kwanu kuto Aka. Afumaneha mwahali ku wena.”

¹⁰⁷ Mulemuhe. Kono cwale hana lemuhile kuli Liweluwelu la Mañolo kona lene libulela ku yena, ka sisupo sa Mañolo sana sweli ku libeleta, sa siya kopano ya mulao wani wa Jakobo mi ni kutokwa ku kutela kwateni hape, kakuli na fumanli Licwe la niti. Mwabona? Kiha matela mwa munzi. Nafelize kaza sibi. Nasi musali ya maswe ni hanyinyani. Musali ali, “Amutahe, mutobona Ye Ni fumanli, ki Muuna Ya ni bulelezi lika ze Ni ezize. Kana Yo haki yena Kreste luli?” Musali... Lisima lani mwendi neli lelinde; neli belekile mulelo wa lona. Cwale nali kwa Liweluwelu la niti. Lisima neli lelinde kufitela Liweluwelu la niti halito kwaluha. Kono cwale Liweluwelu la niti hane litile, lisima la felelwa ki mata alona. Na fumanli kuli kuna ni sibaka sesinde kwa kunwela.

¹⁰⁸ Mi kuna ni sibaka sesinde. Kuna ni sibaka sesinde, mi sani si ku Kreste. Ku Muñoli Joani 7:37 ni 38, Jesu naize, kwa mafelelezo a mukiti wa li tabernakele, “Haiba mutu kaufela una ni linyolwa, ha tahe ku Na, mi anwe.”

Kaufela bona nebasweli kunyakalala. Neba nani mezi anasweli ku welauka kuzwa kwatera, mi—mi kwani kona kone banwela kaufela bona kulona, mwa kunyakalala, mwa—mwa mukiti. Mi ali, “Bo ndata luna neba nwile kuzwa kwa licwe la moyo mwa lihalaupa.” Mwabona, neba i katezi bona bañi lisima, mezi amañwi ainelezi one baka kokuñwi, ni kuto akasheza mwa tempele kwani. Mi kaufela bona neba tahanga kutoka mezi a mi ni kunwa, mi bali, “Lilimo ze felile, bo ndata luna neba nwile mwa lihalaupa.”

Jesu naize, “Kina Licwe lani lene lili mwa lihalaupa.”

Ali, “Nelucile maana yene zwile kwa Lihalimu, mi Mulimu kiyena yana i nelisa.”

¹⁰⁹ Ali, "Kina Maana ani." Yena, Liweluwelu lani, na yemi mwahala bona. Ona Sinkwa sa Bupilo sani nesi yemi mwahala bona.

Mi niteni neba sa A tabeli. Neba itakaleza kuba ni lisima labona; kakuli, mutu na pangile se, mi Mulimu na lumile Sani. Yani kona shutano luli. Neba i katezi masima abona bañi!

¹¹⁰ Yena ali, "Haiba mutu kaufela una ni linyolwa, atahe ku Na, mi anwe." Ki yena Liweluwelu lani.

Mi sina Mañolo abulezi haize, "Kuzwa mwa mba ya hae ku ka poomoka linuka za Mezi a pila." Oh, Kiyena liweluwelu lani leli shelauka! "Kuzwa mwa mba ya hae, kaba mwahali ku yena, kuka buba linuka za Mezi apila."

¹¹¹ Yena kiyena Licwe lani lene lili mwa... Lani neli Licwe la Hagare, mwa linako za butata; fani mbututu wa hae anali bukaufi ni kushwa, fani hana lelekezwi kwanda munzi, mi nali kwani ni Ishimaele. Mezi ahae, mwa lisima la hae lana sweli kuka kulona ni yena, mi amufa ona. Mi alobaza Ishimaele yomunyinyanifafasi; mi aikela, ana ni buta, mi alila, mi, oh, kakuli na salati kubona mbututu wa hae ashwa. Mi hañihañi fela, Lingeloi la Mulena la bulela, mi afumana Ber-... Beresheba, ili—ili lisima lene libuba, mi ni kacenu asa buba. Nali yena Ber-Beresheba wa Hagare, Licwe lani lene lili mwa lihalaupa.

¹¹² Neli yemi kwanu lona Liweluwelu leli tezi Mali, zazi lani, inze liyemi mwa tempele. [Hakuna manzwi fa tepu—Mu.]... nako ya liñungwa. Mwa Zakaria kauhanyo ya 13, Nali yena Liweluwelu lani leli kwaluhile mwa ndu ya Davida, kwa kukenisa, mi ni ka (sibi) kwa kukenisa sibi. Nali yena Liweluwelu lani. Mi mwa Lisamu 36:9, Nali Liweluwelu la Bupilo bwa Davida. Yena usali Liweluwelu lani mwa ndu ya Davida.

Mi ki Yena yali muloki, mwa pilu ya hae mwani. Muloki naize:

Kuna ni Liweluwelu la Mali abuba,
Azwile mwa misinga ya Imanuele,
Mi baeza libi haba kena banwela mwateni,
Ba tapiswa libi zabona kaufela.

Kiyena Liweluwelu lani la Bupilo, Liweluwelu la Mezi. Kiyena Linzwi la Mulimu.

¹¹³ Sicaba sa mazazi amaungulo a si Mu hanile, Linzwi la niti, Mezi a Bupilo; mi ba i katezi bona bañi masima a likopano; mi, hape, kukata, kuyepa!

¹¹⁴ Mi fa lufumana kuli, babile ni masima atibukile. Mi mwani lisima le litezi fela likokwani ze sa lumeli, muikumuso wa kusa lumeli, mukoloko ya lituto, ni zeñwi cwalo, yona ye Iwanisana ni lisepiso za Mulimu. Ki ba nyefuli ba Linzwi.

¹¹⁵ Cwale, masima a ona oba nani, Bibele ibulezi kuli, nali “atibukile.” Lisima *Lelitibukile* ki lisima “lелипуя” lisima, mi li sweli kupuyela kwande. Kisikamaňi seli eza? Lisweli ku hupa mwa kasa ka bulapeli kaka bizwa Katengo ka Likeleke za Lifasi. Mi kwani kona ko lisima leli tibukile li sweli kuba isa, zeo kaufela ki kuli ba Mu hanile, mi cwale ba . . . ona Liweluwelu la Mezi a pilä; mi ba ikezeza masima aa.

¹¹⁶ Kukata milao yemituna ya mikopano ya lituto, tuto, ni zeňwi cwalo. Wani kona mufuta wa masima oba sweli kukata kacenu, o mutu alukela kuba niona yona Ph.D., kamba yona LL.D., kamba yebizwa Tuto ya Buipiteli, kamba zeňwi, mane asikaya kale kuyo kutaza. Masima atezi ngana ya lituto za butu. Ba baisanga mwa likolo zetuna ze za lituto za batu, mi mwahali mwani baba nokela lituto zeba ipangela bona baňi za butu, mi baba luma kuya ni zona. Ki lizazi maňi lelu pila ku lona, masima aikatezi mutu! Hakuna butata kaza . . . Kikabakaleo taba yateňi haibile kuba—kuba munko, oh, mawi, kakuli batu basweli kunwa ku lona.

¹¹⁷ Mi cwale batu haba bata nyakalalo kacenu, kisikamaňi se ba eza? Bona batu, mwa sibaka sa ku amuhela nyakalalo ya Mulena, ba sikuluhela kwa sibi, mwa sibaka sa nyakalalo. Batu babaya kwa likeleke mi baipapata kuba batanga ba Kreste, habaka filikana luli baka yakisa kwai. Mi cwale habaka—cwale habaka bata kuli—kuli babe ni lisheha, ba kumalela kwa litino zabona za kusa i kuteka mi bazwela kwande kuyo mweta bucwani muuna hasweli ku itamaela, kuli akone kuba lizeza muloli. Baeza lika kaufela kuli babe baba zibahala. Babata ku bonahala sina babapali ba mafilimu. Yani kona nyakalalo ya bona.

Fani, Jesu hanaize, “Kina ku kuliswa kwa bona.”

Libaka le bayela kwani, kakuli haba lati kunwa kwa Liweluwelu lani. Ba Li hanile. Haba lati kunwa ku Lona. Baikopanya ilibona kwa mifuta yemiňwi ya milao ya ipangela mutu, mufuta omuňwi wa lisima lelitezi mifuta kaufela ya lika ze inelezi, ze kona kuya ona cwalo.

¹¹⁸ Maabani, neluna ni banana kwani kwa nuka. Na sepa neli la Pelekelo kakusasana. Nelu ile kwani; Billy nasweli ku yamba mwa mukolo. Mi nelisize banana kwateni, muikulyange yomunyinyani ni bona, mwanaka wa musizana, ni mwanaka yomunyinyani wa mushimani, mi lwa zwa kwa nuka kuya—kuya kwa ku bapala ni mukolo. Hamukoni nihaiba kuba ni ku pahama mukolo fa nuka, bakeňisa bunoi, masila, batu ba kwa linuka kwani baba masila, baba mapunu mi bazwelapili. Mukolo nelu fitelezi bukaufi ni luna, sikuwata sa bashimani ba bakona kueza lilimo ze lishumi kazepeli-, lilimo ze lishumi kazene za kupepwä, maňi ni maňi ni likapa la bucwala mwa lizoho la hae, ni kwai. Babiza zani kuli “kui tabisa.” Oh, mawi! Kana lifasi le lika ina nako yekuma kai, ni mulao ocwalo?

¹¹⁹ Konakuli fa ku itukulula bona bañi kwa mihupulo kuli ha ba shwa bakaya kwa lihele, taba yeba eza, bayanga kuyo i kopanya ku leliñwi la masima aipangezi mutu aa. Kacwalo wani kona mufuta oswana wa batu baba fumaneha mwa lisima lani. Haki zeñwi kwanda sishañata sa ze sika kena, ze masila ka mawili-wili a lifasi. Mi ba ikeza silikani ku zani kakuli, sina boma ba kale hane ba bulelanga kuli, "Linyunywani za mafufa lifufelanga hamoho." Habana ku taha kwa Liweluwelu ni kuba baba kenisa kuzwa kwa bupilo bwa sibi. Ba bata ku pila ona mwani, ni ku zwelapili ku swalelela bupaki bwa kuli ki Bakreste. Kiñi? Ba sikuluhile kuzwa ku Yena, ona Liweluwelu la niti nyakalalo, Bupilo, Bupilo bobu petehile ni ku kuliswa. Wani kona mulelo one ba ezelize cwalo, kakuli neba bata ku i kopanya. Bana ni mufuta womuñwi wa batu baba balumela mwa lika zani.

¹²⁰ Kwanu isi kale hahulu, Muzwale Fred ni Na, ni Muzwale Tom, sikuwata saluna neluile kwa keleke yene zibahala hahulu ya Baptist mwa muleneñi wa Tucson, kuyo bona haiba nelu kaba ni sika nyana sene sika lufa ku katuluha nyana ka bunca mwa maikuto. Mi mukutazi ni batu nabulezi sesiñwi ka batu ba mwa Egepita, hane ba kalile musipili nebaca garlic ni, zeñwi cwalo, neba bata kukuta hape mi bayo canga zani. Ali, "Sani siswana sina batu ba kacenu."

Mi, luna, mutu kaufela naize, "Amen!" Nali kuba nibone sikuwata sesi cwalo! Keleke kaufela ne ilatehisize meto a mukutazi wa yona ni kutalima kwa mulaho kubona kuli ki mañi yana bulezi "amen." Neba sabile mane kubata kushwa. Nebasa zibi kuli neli sikamañi.

Fani, Davida hanaize, "Mu ezeze lilata la tabo ku Mulena. Mu Mulumbeke ka liharepa! Mu Mulumbeke ka tumbuli! Sika kaufela sesina ni bupilo silumbeke Mulena. Mi amulumbeke Mulena!" Mulimu unyakalalela mwa batu ba Hae. Nibona baba itutile, ba bulele, "Amen," sika kaufela ha si bulezwi hande.

¹²¹ Kiñi hamusika kusikuluha kuzwa kwa milao ni masima a lifasi, kokena mwa mulao o sepahala wa Mulimu, yeli liweluwelu leli shelauka, Jesu Kreste? Kiñi hamusika mwa sikuluhela ku Yena, koo Mulimu ali yena mufani waluna wa tabo yeñata, mufani waluna mwa buñata bwa milumbeko, mufani waluna wa zeñata mwa ku kuliswa? Ku iketa kwa lipilaelo zaka kuzwa ku Mulimu.

Ha Ni filikani, Ni fumana ku kuliswa ku Kreste, isiñi mwa mushanga wa kwai, isiñi mwa lika za lifasi, isiñi mwa kuikopanya mwa lituto za litumelo; kono kimwa kufumana Yena, lona Linzwi la sepiro la Na bulezi, "Ha Ni ya cwana, Ni ka kuta hape ku to mi amuhela." Ni fumana nyakalalo yaka ku sani. Kiyena Tabo yaka.

¹²² Kacenu babulela cwana bali, ka kuikenya mwa lika ze ni ka kupanga Katengo ka Likeleke za Lifasi ka, kuli baka ba ni sibaka sesinde sa kupila ku sona. Kwa munahano waka o sephahaha, bakaba ni sibaka sesinde sa ku ezeza sibi ku sona. Cwalo kona... Taba kaufela ki sibi, niha kulicwalo; isi kupila ku sona, kono kushwa ku sona. Kupanga sibaka sa ku ezeza sibi ku—ku sona, mwa sibaka sa kupila kusona.

¹²³ Taba yeñwi kaufela, kwanda Jesu Kreste ni Linzwi la Hae la Bupilo, ki lisima leli tibukile. Sika kaufela sesi lika ku Li yolisa; sika kaufela sesi lika kueza kuli sitise kozo, sika kaufela seo mulika ku eza kutisa mbombolelwa, mufuta kaufela wa nyakalalo ye mukona ku amuhela kuzwa kwa sika kaufela, ka kuba sika sa kuyolisa sika Se, ki lisima leli tibukile leelitezi masila. Yena ufanga ku kuliswa ko ku petehile.

¹²⁴ Na hupula kwanu, linako za mbumbi zepeli, Ne ni zwezi fande. Neku nani mukuli kwani yana bulela kuna kuli, ali, "Mwa ziba, libaka le mu bulelela kaza basali kazani, kutina lika ze kuswani zani ni lika," yena ali, "kakuli wena u mutu ya hulile." Ali, "Leo kona libaka la teni."

Se nili, "Talima kwanu. Kana una ni lilimo zekai?"

Ali, "Twenti-seveni."

¹²⁵ Se nili, "Hane Ni sana ni lilimo ze nyinyani hahulu kufita wena, Ne ni kutaza lika ze swana."

Ne ni fumani Liweluwelu la ku kuliswa. Kiyena siemba saka. Amen! Haibile fela kuli Wa nifa zani, bwani kona bunde. Bwani kona—bwani kona... Bwani kona bukabali bwaka, ki kutalima ku Yena, kutalima lizoho la Hae hali beleka ni kubona Sa sweli kueza. Hakuna siliba sesiñwi se Ni ziba!

Oh, ki sibuba kwa bunde
Ani kenisia sina litwa;
Hakuna sibuba se Ni ziba,
Kwanda Mali fela a Jesu.

Kuna ni Liweluwelu leelitezi Mali,
Azwa mwa misinga ya Imanuele,
Ba ezalibi banwela mwateni,
Ba tapiswa libi zabona kaufela.

¹²⁶ Na mi bulelela, hakuna sibuba sesiñwi se Ni ziba kwanda Liweluwelu lani. Li ni kenisize hane Ni na ni masila. La ni beya ya kenile, kakuli Ni bata kupila ka swanelo ku Lona, kunwa Mezi amanca ataza moyo waka ka nyakalalo.

Na kona kuba hahulu yomunyinyani kwatasi, ni ku ikutwa kuli ha Ni koni kuya ni hanyinyani... musipili omuñwi, hanikoni kuya kokuñwi; fohe kipeto Na kubama ni kubeya munwana waka fa sepiso, ni kubulela kuli, "Mulena Mulimu, Wena u mata aka. Ki wena ku kuliswa kwaka. Ki wena zaka

kaufela." Ni kona kukala ku ikutwa Sesiñwi se sibila kuzwa mwahali kuna. Na zwa ku yona.

¹²⁷ Sina ha Ni fitelezi lilimo ze mashumi aketalizoho za kupepwa, Ni kona kuzuha kakusasa, mwa ziba mo kuinezi, hamukoni nihaiba kutulukisa liutu la mina fa mumbeta. Mawi, hamukoni ni hanyinyani kueza cwalo; mi yomuñwi fa munyako, ya ngongota, kamba Billy kuni bulelela kuli kuna ni yani tokwa kapili, kokuñwi ko Ni lukela kuya. Mi Na sepa, "Kana Nikona kueza cwani?" Kulika kutulukisa liutu kwona.

Na sepa, "Ki wena Liweluwelu leelitezi mata aka. Amen! Mata aka ni tuso lizwelela ku Mulena. Ki wena liweluwelu laka leli shelauka! Ki wena bunca bwaka! 'Baba libelela ku Mulena baka ancafazwa mata abona; baka pahama ni mafufa sina mbande; baka mata, mi bas katali; baka zamaya, mi basa zwafi.' Mulena Mulimu, wo ki musebezi waka, wa kuya. Ni bizelizwe kuba fa sibaka sa musebezi." Mi taba ya pili mwa ziba, Sesiñwi sikala ku welauka kuzwa mwahali kuna.

¹²⁸ Ka zazi leliñwi, kwani mwa sibaka sesinyinyani, Ne nina ni mukopano ona kwanu mwa Topeka, Kansas; nekuna ni mushimani, mukutazi yomunyinyani, alimuñwi wa ba ongaonga baka bapili. Muzwale Roy, yainzi fa, wa hupula sibaka. Mwahali mo, mwahala sibaka sesituna se kwani, neku na ni—ni... Mukutazi yo nakeni mwatasa situwa sa sibaka, limota se li mu wela ku mulimba kwatasi. Mutu yo munyinyani nabata kushwa. Sibiti sa hae nesi pazuhile. Lubete lwa hae nelu shenyize mwa sibaka salona. Libyana za muwela fa halimu.

¹²⁹ Neni inzi kwa mukushuko, ninze ni ambola ku musalaka. Na li, "Musala, wa ziba, kambe Jesu nali fa, wa ziba sa Na kaeza?" Se nili, "Hana ni tusize, 'Na lumela Linzwi lani,' nasweli kutusa Kreste." Mi se Nili, "Ani ki makilikicani a diabulosi." Se nili, "Kambe Jesu naka bateni fa, Na kaya kuyo beya mazoho a Hae akenile ku yena. Mushimani yani na kana hande. Hanina taba haiba sibiti sa hae si pazuhile. Na ka ba hande, kakuli Jesu naka zamaya mwahali mwani kakuziba Yo Nali yena. Na zibile pizo ya Hae, Mañolo nali alukile, inza iponahaza ku Yena kuli Na zibile Yo Ali yena, mi isiñi... isiñi hakuna muluti wa ku kakanya. Na kabeya mazoho a Hae ku yeba, ni kubulela kuli, 'Mwana, akube hande,' uzuhe kuzwa fo." Mi se Nili, "Hakuna bo diabulosi babañata mwa lihele ba bakona ku bulaya mushimani yale, he." Na li, "Na ka ba hande." Kono se Nili, "Wa bona, mulatiwa, Yena nali Jesu, ona mazoho akenile a Mulimu."

Na li, "Na ni mueza libi. Neni pepilwe ka kupepwa kwa ku fosa. Bo ndate ni boma neba pepilwe bali ba ezelibi, mi Ni na hani sika sesinde."

Mi Na li, "Kono kana wa ziba? Haiba Mulena uka nifa pono ni kuni lumela kwani, konakuli seo sika shutana." Se nili, "Ne

ni kaya kwani kuyo mu beya mazoho, naka zuha mwa mumbeta wani kambe Na ni file pono.”

¹³⁰ Mi Na kala ku nahana, “Hasamulaho wa lika kaufela, kambe nei kaba pono, nei kaba sikamañi? Neli mazoho aswana a masila ku, uh-huh, mutu yaswana inza mu lapelela, mazoho a masila.”

Mi se Ni kala ku nahana, “Na ni tuyemeli wa Hae. Mi, Mulimu hani boni. Mali ani a Ya lukile ateni fani fa aletare; Kona ani lapelela. Kiyena ku talelela kwaka. Kiyena tapelo yaka. Kiyena Bupilo bwaka.” Ni li, “Sika fela sesika tisa kuli ni beye mazoho aka kuona, ka tumelo, kakuli ne Ni na ni tumelo mwa pono. Mi haku sina pono, ona tumelo yeswana i kaeza lika ze swana; kacwalo Nikona ku itemuha na muñi kutokwa kuba sika, kono ni lemuha Yena mwa lika kaufela. Kiyena Bupilo bwaka. Kiyena Muyemeli wa ka. Hakuna kopano yene ni lumile; Yena uni lumile. Haleluya! Niya ka Libizo la Hae. Nika beya mazoho aka ku yena.” Neni ile kwani ni kuyo beya mazoho mushimani yani, mi busihu bwani nali mwa mukopano, ku iketa luli. Amen!

¹³¹ Oh, eeni, Kiyena Liweluwelu lani. “Hakuna sibuba sesiñwi se Ni ziba. Hakuna kwanda Mali a Jesu!” Na ni mueza libi, Ni tuyambaeli, mutu ni mutu wa luna, kono fapila Mulimu lu petehile. Je-... “Mube baba petehile, mane mube sina Ndata mina mwa Lihalimu hali ya petehile.” Kana mukona kuba cwani? Kakuli Ya petehile ki yena lu yemela kwani. Liweluwelu Lani liteni zazi ni zazi, amanca. Isiñi lika zeñwi ze inelezi, kono ki amanca zazi ni zazi, a tapisa libi zaka kaufela. Kiyena Liweluwelu lani.

¹³² Cwale ka kukwala, Na kona kubulela cwana. Sika kaufela sesi shutana kuzwa ku Se ki lisima lelitibukile, mi mafelelezo lika sulula zona ze mubeile ku lona; haiba mubeya sepo ya mina kaufela, nako ya mina kaufela, ni lika kaufela, ku leliñwi la masima a. Jesu naize naali masima atibukile. Mulimu naize, “A tibukile, mi akapuya hakuna taba ku semusela mwateni.” Hamukoni kuya mufumbo ni ona, kakuli aka puya. Kakuli ki Yena fela nzila yeya kwa Niti, kwa Bupilo, ni kwa nyakalalo ya Kuyakuile, ni kozo ya Kuyakuile. Kiyena fela Anosi mi ki yona fela nzila yeya Kwani. Oh, mawi!

¹³³ Liweluwelu lelisa palelwii la Bupilo ki Jesu Kreste. Kiñi? Mi Yena ki Ufi? Linzwi, leli swana; Linzwi, Bupilo, ona Liweluwelu, “ya swana maabani, kacenu, ni kuyakuile.” Mulumeli wa niti, Ki nyakalalo yeipitezi ya hae, Bupilo bwa hae bobu ipitezii. Ni ku kuliswa kwa hae kwa buipiteli bu ku Kreste. Hakuna ku ikataza, hakuna ku hoha, hakuna kuikopanya, hakuna ku pikulusa; ki kulumela fela ni ku pumula. Sani kona Sa sweli ku lumela.

¹³⁴ Sina ndate Abrahama; nasika hoha, nasika saba, nasika bilaela. Na nana ni Linzwi. Na yendamezi fa lizwele la El Shaddai. Fani Abrahama hana nani lilimo ze mwanda za kupepwa, Mulimu aiponahaza ku yena, mi ali, “Kina ya Mata

kaufela.” Linzwi la Siheberu la *El Shaddai*, katalusa, “mutu Wa Mazwele.” “Mi u supezi, mi mata ahao afelile, kono aku yendame fela fa sifuba sa Ka mi u anye mata ahao kuzwa kwa Liweluwelu le.” Amen! Kisikamañi sana anyize ku sona? Mubili o munca. Nana ni mbumbutu, ka Sarah. Mi, lilimo ze mashumi aketalizoho hasamulaho, na bile ni bana baba supile ka musali usili.

¹³⁵ Oh, El Shaddai! Testamente ya Kale ya bonisa sa Na ezize, Testamente ye Nca ibulela sa Ka eza. Amen! Mwa Testamente ya Kale...

¹³⁶ Cwale moyá ukuzize, kacwalo Nika akufa mi nifeze fa cwale, ka muzuzu fela.

Ni tabela ku bulela se Ni sika kwala kale. Ne nibile ni mutala omunde o ka nako yeñwi. Ne ni sweli kupota pota. Mi batu babañata kwanu... Kwani kwa Georgetown, kwatasi kwani kwa Milltown, neku banga, kwani kwa mulaho mwa malundu, liweluwelu. Neli liweluwelu leli shelauka. Neli likana fa bukaufi ni liñokolwa ze—ze ne kamba ze ketalizoho za mezi, asweli ku suluha fela nako kaufela, ni liweluwelu leli una kwani. Mi ku potoloha lona cwalo nekuna ni limela zeñata, mwa ziba, ni bucwani mwani, bobu nunkela bwani. Mi, oh, Ne ni nyolelwanga fela kuba kwani, oh, mawi, ku yofita kwa liweluwelu lani. Mi Ne ni lobalanga bukaufi ni sika se ni kunwa fela ni kunwa, ni kuina fafasi ni kunwa, kulitela.

Mi silimo ni silimo Ne ni tahanga ona kwa liweluwelu leli swana le. Neli sikabe li kala, maliha kamba mbumbi. Nelisa koni ku li kangelisa. Hamukoni ku kangelisa liweluwelu leli shelauka. Oh, batili! Oh, batili! Hanina taba moku—moku ka batela, halina ku kangelisa zani. Mwakona ku kangelisa lisima; ki mbundu ye likani fela kipeto la kangelisa. Mwabona?

Kono sika kaufela sesi sweli ku zamaya, sesina ni Bupilo ku sona, ki ku zamaya cwalo. Mi hamukoni ku kangelisa Siliba sesi shelauka. Hakuna taba kamba moyá uswabile cwani mwahala sibaka, Siliba se kamita sika pila. Kupilá kwa Siliba sani.

¹³⁷ Mi Neni lemuhile kwani, Neni ile kuli Ni yo nwa kwani, mi, oh, mawi, ki mezi fela amanca! Hamulukeli ku bilaela, “Kutongoka, Ni sa yofita kwani, ku ikalelwa kuli lika tuhela ku buba?” Nelinze libuba...

¹³⁸ Mulimi wa kale na ni bulelezi, ali, “Bo kuku ba baana neba nwanga ku lona.” Mi ali, “Hali sikabe likala kamba sika kaufela. Isali liweluwelu leli swana, li kasheza mwa nuka yebizwa Blue River kwani.”

¹³⁹ Na hupula, “Oh, mawi, ki sibaka mañi kwa bunde sa mezi!” Neni zamaya mwendi maile kuzwa mwa nzila, ku yofita kwa sibaka sani, kakuli neli sibaka sesinde luli sa kunwelanga teni. Oh, bunde bwa mezi ani! Oh, mawi!

Ne—Ne ni yanga kwande kwani mwa lihalaupa lani, Arizona cwale, Ni sa hupulanga ka lona, “Liweluvelu lelinde lani kwatasi kwani, kambe Ne ni ka lobalanga fela kwani!”

Sina Davida hanaize kuna, “Oh, kambe Neni ka nwa fela hañwi kwa liweluvelu lani!” Kambe naka yo fita fela kwani!

¹⁴⁰ Mi Ne niinzifafasi zazi leliñwi, mi Ne nina ni taba iliñwi ye sehisayaene ezahalile kuna. Mi se Nili, “Ki sikamañi sesi kueza kuba ya tabile nako kaufela? Ni lakaza kuli Ne ni kaba ya tabile sina cwalo. Kiñi, Na li kuba ni ku bone uswabile, Nali kukala ku tahanga kwanu. Hakuna nihaiba taba iliñwi ye ku swabisa.” Se nili, “Kamita wena utezi nyakalalo. Usweliku tulaka ni ku shelauka ni ku zwelapili. Maliha kamba mbumbi, kubate kamba kucise, seo kaufela sili sona, kamita utezi nyakalalo. Kisikamañi sesi ku ezisa cwalo...? Sikamañi, ki sikamañi sani? Kikuli Ni nwanga ku wena?”

“Batili.”

Ni li, “Kihande, mwendi tushakame tu nwanga ku wena, mi utabela hahulu.”

“Batili.”

Se nili, “Kihande, kisikamañi sesi ku welaukisa sina cwalo? Kisikamañi sesi kupanga kuba ya tabile hahulu cwana? Kisikamañi sesi kupanga kuba ya tezi nyakalalo cwana?” Nali, “Kana kikuli—kikuli linyunywani li nwanga ku wena?”

“Batili.”

“Kakuli Ni nwa ku wena?”

“Batili.”

Se nili, “Kulukile, kisikamañi sesi kupanga kuba ni nyakalalo yeñata cwana?”

¹⁴¹ Mi kambe liweluvelu lani nelika bulela kuna, nelika bulela cwana. “Muzwale Branham, haki kuli unwa kwanu; Na itumela ka seo, mi ni kuli Nakona ku tisa amañwi kwa linyunywani. Nifa mutu kaufela ya bata ku nwa. Taba fela yo lukela kueza ki kutaha kwanu mi unwe. Kono, sesini panga kuba ya tabile, ha kina ya shelauka, ki sesiñwi mwahali, sesini kasha. Ki sesiñwi sesi ni shelaukisa.”

¹⁴² Mi cwalo kona moku inezi mwa bupilo bobu tezi Moya. Sina Jesu hanaize, Nali mwa... Mwabona, U mifa maweluvelu a mezi ashelaukisa Bupilo bobusafeli, liweluvelu, ku suluhako ku sa tuheli ka ku swalelela ku buba. Kamba babañwi baba siezi ba keleke ba pahami kamba ba wile, mina musali fa Liweluvelu lani.

Kikabakalañi hane mukanga mulao wa kopano ya kale ni lisima, otezi likokwani ni lika kaufela, ni kunwa ona mwani moku inelezi lika cwalo, kanti imbo mu memilwe kwa Liweluvelu, Siliba sesi shelauka?

¹⁴³ Ni sepa mone likashelize fela, ni ku tulaka, ni—ni ku welauka, ni kuseha, ni kunyakalala, ni kutula, ni ku bapala. Kubata, litabula; mbumbi, linanga, fani lifasi kaufela hane li omile, lona neli welauka sina mone li ezeza kamita. Kakuli neli tungile, ne lina ni mibisi, kukalela mwataswa macwe kona mone lizwelela.

¹⁴⁴ Oh, mutuhele ni pile ni Kukasha kwani! Munge milao kaufela ya ipangezi mutu yemu bata, libuba za mina za kale ze inelezi, kono muni tuhele ni tahe kwa...kamba masima ainelezi. Kono, kono muni tuhele ni tahe kwa Liweluwelu le, muni tuhele ni tahe kwani ko Li inzi litezi. Kiyena Nyakalalo yaka. Kiyena Liseli laka. Kiyena mata—Kiyena Mata aka. Kiyena Mezi aka. Kiyena Bupilo bwaka. Kiyena Mufolisi waka. Kiyena Mupulusi waka. Kiyena Mulena ka. Lika kaufela ze Ni tokwa li fumaneha ku Yena. Kisikamañi ha Ni ka tabela kuya kwa sika sisili?

¹⁴⁵ Muzwale, kezeli, kiñi ha usike wa taha kwa Liweluwelu le busihu bo? Kana haulati, haiba walikuba ube kwani, kana hauna ku I amuhela busihu bo halunze luinamisa litoho zaluna?

¹⁴⁶ Masima atibukile, apuya, asuluha, lifasi lisululela ku ona, atezi masila kuzwelela fa lishete ni mwa mazazi amañwi. Kiñi haisike yaba Siliba se, leo lika zani halikoni kuina kulona, ona Liweluwelu lelituna lelitezi Mali le, azwile mwa misinga ya Imanuele? Kiñi hausa amuheli sani busihu bo? Mi Mulimu alu tuse busihu bo, mwa na ha yeomile ye, ye nani linyolwa. Sina mupolofita hanaize, “Kiyena Licwe mwa na ha ye katezi.” Kiyena Liweluwelu lani. Kana hau lati kutaha ku Yena busihu bo, mwa lipilu zamina, halunze lu lapela?

¹⁴⁷ Ndata luna Yomunde yakwa Lihalimu, hakuna Liweluwelu leliñwi, minembo hainze iliziwa, “Hakuna liweluwelu leliñwi le Ni ziba; hakuna sesiñwi konji Mali a Jesu fela.” Ne ni pepezwii ona kwani, Ni hulezi kwani; Ni bata kupila kwani, ni kushwela kwani, ni kuzuha hape kwani, fa Pila pata ya Hae. Kamita, Mulena, mutuhele nibe fa Pila pata ya Hae, kakuli hakuna usili ye Ni ziba. Hakuna lituto za litumelo, hakuna lilato; hakuna lilato konji Kreste, hakuna lituto za litumelo konji Kreste, hakuna buka konji Bibebe, hakuna sika sisili kaufela, hakuna nyakalalo kwanda Hae. U Munge kuna, O Mulimu, Hanina taba kaza lifasi ze Ni nani, ne—ne likaba ze shwile, Ne ni ka potoloha cwalo ni mazoho aka kwa toho yaka. U Munge kuna, Nikabe ni shwile, Mulena. Kono Abe ku na, konakuli Nulule kiye tabisa sina Kandao, konakuli hakuna libaka ze cisa ni libaka ze omile, nihaiba lona lifu kasibili halina tulo. Halubeñi fela ni Yena, Ndate. Mu Mufe, ka buñata, ku mulumeli kaufela mo busihu bo, sina haba libelezi mwa sibaka se.

¹⁴⁸ Buñata bwa bona ban ni ku zamaya misipili ye mitelele busihu bwa kacenu, habanze baya kwa mandu abona, mi wo

haibe munahano wabona, "Ni pila kwa Liweluwelu lani. Ni pila kwani, ninwa amanca, hola ka hola."

¹⁴⁹ Mi haiba haba sika amuhela sani kale, haisali, haba Mu amuhele cwale, ili kuli bange Liweluwelu onafa cwale ni bona. "Ni kaya ni mina; Ni kaba ni mina kuisa kwa mafelelezo a lifasi." Aku alabe lika ze, Ndate.

¹⁵⁰ Mi cwale halunze lu inamisize litoho zaluna, kana kuna ni mutu mo, busihu bo, kamba ki babakai ba bakali, "Mulena, aku niise kwa Liweluwelu lani onafa cwale. Na hani si kataha kale kwanu kuto utwa; Ni tahanga kwanu kuto fumana sika Sesiñwi. Ni tahanga kwanu kuto fumana Wena, Mulena. Nina ni kutokwa kwa Hao busihu bo. Akutahé mwa pilu taka onafa. Kana Uka eza cwalo, Mulena?" Mulimu ami fuyole. Mulena atohonolofaze mutu ni mutu.

¹⁵¹ Ndate, U boni mazoho, mane ni mwa limota, ni mwa libaka zeñwi, kwande. Wena—Wena u aboni, Ndate. Ni—Ni lapela Uka bafa lika kaufela zeba tokwa. Mwendi basweli kunwa mwa lisima leliñwi la kale, Mulena, ki leli kuswani fela hali sika tunga ki lisima la i katezi mutu, li tampakani ka mifuta kaufela ya lituto zenca, kulatula Linzwi. Na lapela, Mulimu, kuli busibu bo ba tahe ku Yena Yali yena Liweluwelu lani, ona Liweluwelu lani la Bupilo. Aku alabe, Ndate. Ni ba beya ku Wena cwale ka Libizo la Jesu.

¹⁵² Mi No ni bulelezi, "Haiba uka kupa sika kaufela ka Libizo la Ka, sika ezahala." Cwale, Ni kupa se, Mulena, haiba Ne nisika hupula kuli sika ezahala. Ne nika—Ne nika bulela fela ka mukwa wa mukiti wa kamita. Kono Na ba lapelela, ka busepahali. Na ba lapelela, ka kulumela kuli Uka alufa so No sepisize.

¹⁵³ Mi cwale Na ba zusa mwa lisima lani busihu bo. Ni bangá kuzwa mwa sibaka sene basweli kunwa kusona, ili ko neba sa kuliswi; kutaha kwa Liweluwelu le. Ni eza cwalo ka Libizo la Jesu Kreste.

¹⁵⁴ Ba ki ba Hao, Mulena. Haba kone kunwa ku Wena, ona Mezi apila, Liweluwelu la Mezi apila. Ka Libizo la Jesu, Na kupa. Amen. Aku alabe, Mulena.

Oh, ki sibuba kwa bunde
Nakena sina litwa;
Hakuna Siliba se Ni ziba,
Mali a Jesu feela.

Se si ka ni tapisa?
Hakuna Siliba se Ni ziba;
Se si ka ni kenisa?
Mali a Jesu feela.
Oh, . . .

Jesu, bafolise ba, Mulena! Aku alabe, Mulena, ka Libizo la Jesu. Na lapela, Mulimu, kuli Wena . . . ? . . . Wena uziba lika kaufela.

Ha ku na Siliba,
Oh, ki Mali a Jesu feela . . .

¹⁵⁵ Munahane ka seo, hakuna siliba se Ni ziba! Hakuna sika se ni ziba ka Yena. Hani itakaleza kuziba sika kaufela konji Yena. Hakuna sika sesiñwi konji Mali a Jesu! Oh!

Oh, ki sibuba kwa bunde
Nakena sina litwa;
Hakuna Siliba se Ni ziba
Oh, ki Mali a feela a.

¹⁵⁶ Halunze lu opela cwalo hape, halu swalaneni mwa mazoho yomuñwi ku yomuñwi. Kana mwa latana nji? Kikuli kuna ni yali mo yana ni sesiñwi kulwanisa yomuñwi? Haiba ku nani, zamaya uyo li lukisa. Kana mukaeza cwalo? Lusike lwa zwa mo ka mukwa ocwalo. Mwabona? Haiba munna ni taba ni mutu, muye mu yo kondisa litaba, onafa cwale. Onafa cwale kona nako ye lukile kuli muye, muli, "Muzwale, kezeli, Neni bulezi sika ka wena, Ni hupuzi sesiñwi. Ne nisika talusa kueza cwalo. Uni swalele." Mwabona, yani kona nzila mwa ku ezeza. Halubeñi ni Liweluwelu mwahali ku luna, ka linako kaufela. Mwabona?

Ha ku na Siliba,
Ki Mali a Jesu feela.

Oh, mali a Jesu
A ni ke ni si ze;
Oh, ha ku na Siliba,
Mali a Jesu feela.

¹⁵⁷ Oh, kana Ha ki yomunde? Hakuna liweluwelu leliñwi! Haluna ku isilafaza ka lika zeñwi. Lu kauhani, lu siile lifasi kwa mulaho. Halu tabeli ni hanyinyani za garliki ni masima a Egepita atibukile. Lu mwa musipili ni Mulena Jesu, ona Licwe leli natilwe lani, amen, kuca Maana yezwa kwa Lihalimu, ni kunwa; kuca Lico za mangeloi, ni kunwa kwa Licwe. Amen!

Ha ku na Siliba,
Mali a Jesu feela.

Cwale halu inamiseni litoho zaluna.

¹⁵⁸ Kulapela kuli Mulimu afuyole kakutala mutu ni mutu wa mina, kuli muhau wa Hae ni sishemo libe ni mina ku yofita kwa sunda ye taha. Mi haiba sika kaufela siezahala, kuli alimuñwi wa mina apunye kwa buse cwale, muhupule fela kuli ki lihola ze likani za ku lobala ni ku pumula kufitela halu kopana. Muhupule, kuli, "Bani baba pila mi ba siyezi habana ku tibela bani baba lobezi, kakuli Tolombita ya Mulimu, ona Tolombita ya mafelelezo yani . . ." Ye silezi kale ilila. Mi Tolombita ya mafelelezo yani, sina Liswayo la mafelelezo, ikaba Kutaha kwa

Mulena. "I ka lila, mi baba shwile ku Kreste baka zuha pili." Ku pumula fela konji nako yani.

¹⁵⁹ Mi haiba muka holofala, muhupule:

U unge Libizo la Jesu,
Ku ba tebe ya hao;
Ha u li mwa ha la miliko,
Nga Libizo mwa tapelo. (Diabulosi uka saba.)

¹⁶⁰ Amuhupule fela, lu sepa ku kopana ni mina kala Sunda leli tatama kakusasana. Muyotisa bakuli ni baba zielehile. Ni ka mi lapelela. Mu ni lapelele cwale. Kana mukaeza cwalo? Muli, "Amen." [Puteho ili, "Amen."—Mu.] Ni ka mi lapelela, kuli Mulimu afuyole.

...Libizo mwa tapelo.

Libizo Lelinde, Libizo lelinde, O lelinde!
Sepo ya kwa Halimu;
Libizo Lelinde, O lelinde!
Ta bo ya kwa Halimu.

Ku wa ka Libizo la Jesu,
Ku wa kwa mautu a Hae,
Mulena a Lumbwe Ha limu,
Mu si pi li ufela.

Libizo lelinde, Lelinde, (kana haki lelinde ni munati?)
Sepo ya kwa Halimu;
Libizo, Libizo lelinde, O lelinde!
Ta bo ya kwa Halimu.

¹⁶¹ Ki nto yetata kamita u mi siya. Niha Ni ziba kuli mwa bila, kono kuna ni fela sika... Halu, timana iliñwi ka sesiñwi, kana muka eza cwalo? [Puteho ili, "Amen."—Mu.] Kana muka eza cwalo? *Ufuyolwe Muhala O Tama*, kezeli. Ki babakai ba baziba pina ya kale yeo? Nelu i opelanga, lilimo zakwa mulaho.

¹⁶² Mi Ne nisweli ku nahana, busihu bo, "mazoho amabeli, mwahala baba eza mianda, baba siyezi," hane lu opelanga pina yeo mwahala tabernakele, ni ku swalana mazoho mutu ni mutu. *Ufuyolwe Muhala O Tama*. Ni pumbekile babañata ba bona, ona kwanu kwa matotaeti. Basweli balibelela. Ni kaba bona hape. Na ba bonanga, fa linako zeñwi, mwa pono, ha Ni talima kwa buse lisila. Bateni kwani.

Halu inamiseni litoho zaluna cwale halunze luopela.

I be ye fuyozwi
Ta bo ya bu Kreste;
Mwa kopano...
Nge ya kwa Halimu.
Ha lu ta...

Cwale hamu otolohe mi muswale lizoho la yomuñwi.

. . . ta si ya na,
Cwale mu inamise litoho zamina.

Pilu ze bu tu ku;
Kono lu ta yo kopana,
Ku bo nana hape.

¹⁶³ Ka litoho zaluna ze inami. Ni sikululela sebelezo ku bo
mukutazi cwale, mi mu lukuluhe ka . . .



MASIMA ATIBUKILE LOZ64-0726E
(Broken Cisterns)

Liñusa le ka Muzwale William Marrion Branham, neli katalizwe lwa pili mwa Sikuwa la Sunda manzibwana, Sikulu 26, 1964, ili fa Branham Tabernacle mwa Jeffersonville, Indiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2016 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org